

## VADGERI NGOKUNYORA

## KWAJOHANI

**1** Pakutanga walapo Izwi, neIzwi waia naMhari, neIzwi waia Mhari. **2** Uyu walapo pakutanga naMhari. **3** Ziro zeshe zakasikwa ndiye; nangepabanzi pake ingapasinna ciro cakasikwa kweizo zakasikwa. **4** Kwalapo kupona kwari, nokupona ukwo kwaia kujeka kwavanhu. **5** Nokujeka kunojeka mucidima; necidima acizi kukunyisa.

**6** Kwakauya munhu, wakatumya ndiMhari, zina rake rala Johani. **7** Uwo wakauya kuita capupu, kuti apupure ngokujeka, kuti vanhu veshe vatende ndiye. **8** Iye wainga asiriye kujeka ukwo akadi, asi wakatumya kuti apupure

ngokujeka ukwo. 9 Kujeka ukwo kwaia kujeka kwecakwadi, ukwo kunojekisa vanhu veshe vanoba-rwa munyika. 10 Uyu waia munyika, nenyika yakasikwa ndiye, nenyika aizi kumuzia. 11 Wakauya kwezake, nevake avazi kumuashira. 12 Asi kwavari veshe vakamuashira, wakavapa simba rokuti vaite vana vaMjari, kwavari avo vanotenda zina rake: 13 Avo vasikazi kuBarwa ngengazi, kunyazi ngokuemura kwenyama, kunyazi ngokuemura kwomunhu, asi vakaBarwa ndiMjari. 14 Ne-izwi wakaltwa muiri, wakagara pakati pedu, nesu takaringira utende hwake, utende huri hwouwo wakaBarwa ega ndiBaBa, akazara ngenyasha negwinyiso. 15 Johani wakaita capupu ndiye, akadaidzira, eciti, Uyu ndiye wendakaereketa ndiye, kuti, Uwo unouya sure kwangu, waindoapo pamberi pangu, ngokuti waindoapo ndisati ndaapo. 16 Ngokuti isisu teshe takaashira kwezakawanda zake, nenyasha ngenyasha. 17 Ngokuti zironzo zakahinwa kupotya ndi-Mosi, asi nyasha negwinyiso zakapo ndiye Jesu Kristu. 18 Akuna wakamboona Mjari nokuti ngouri mukuwo; uwo wakaBarwa ega ari-Mukororo iye unogara paditi pa-BaBa, ndiye wakamupangidzira.

19 Nelci ndico capupu caJohani, apo vaJuda vatuma kwaari vapristi nevaRevi kubva Jerusarema, kumubvunza kuti, Uriani iwewe? 20 Naye wakatenda, aazi, kukanidza; wakatenda, eciti, Inini andiri Kristu akadi. 21 Navo vakamubvunza, Ndizo uriani? Uri Erija here? Naye wakapingura, Andiriye akadi. Uri uwo muprofeti

here? Naye wakapingura, Haiwa. 22 Ndizo vakati kwaari, Uriani? kuti tiwone cokupingura avo vakatituma. Unotinyi iwewe ngokwako? 23 Wakati, Ndiri izwi rounodaidzira mushango, kuti, Ruramisai njira yaMambo, kudai ngezakaronza Isaya muprofeti. 24 Naavo vakatumpha vaia vevaFarisi. 25 Navo vakamubvunza, vakati kwaari, Ndizo unobapatidzirenyi kudai usiriye Kristu, nokuti Erija, nokuti uwo muprofeti. 26 Johani wakavapingura, eciti, Inini ndinobapatidza mumvura: asi pakati penyu panoema uwo womusikazi, 27 Ndiye uwo unouya sure kwangu, wakatsanangurwa pamberi pangu; uwo wendisikasisi inini kuti ndisunungure rusinga rwegwada rake. 28 Izi zakaitika muBetabara seri kweJordani, apo paalibapatidza Johani.

29 Necimangwani aona Jesu eciuya kwaari, akati, Ringirai, Kahwai kaMjari kanodusa kushaisha kwenyika! 30 Uyu ndiye wendakaereketa ndiye, kuti, Sure kwangu kunozouya munhu uwo wakatsanangurwa pamberi pangu, ngokuti waia pamberi pangu. 31 Neni inga ndisikamuzii, asi kwegu kuti unozopangidzirwa kuvaIsraeri, saka ngendaa iyi ndakauya ndecibapatidza mumvura. 32 NaJohani wakaita capupu, eciti, ndakaona Mjeya wecidzaka kubva mudenga unonga njia, ukagara padera pake. 33 Neni inga ndisikamuzii; asi iye wakandituma kuti ndibapatidze mumvura, iye uwo wakati kwendiri, Wounozoona Mjeya wecidzaka nokugara padera pake, uwo ndiye unobapatidza ndiMjeya Wakacena. 34 Neni

ndakaona, ndakapupura kuti uyu ndiye Mukororo waMjari.

35 Necimangwanize Johani aingga akaema nevairi vevadzidzi vake. 36 Naapo amuona Jesu ecihamba, wakati, Ringirai, Kahwai kaMjari! 37 Uadzidzi avo vairi vakamuzwa eciereketa, vakamuteera Jesu. 38 Jesu wakakunukuka akavaona vecimuteera, akati kwaari, Munotsakenyi? Wakati kwaari, Rabi (ukwo kunoti ngokukumucwa, Mudzidzisi) unogara pari? 39 Wakati kwavari, Uyai muzoona. Ndizo vakauya vakaona apo paaligara; navo vakagara naye ngezuya iro: ngokuti rala rinonga awa recigumi. 40 Umje wevairi avo vakamuzwa Johani eciereketa, oroomuteera, wala Andreu munuguna waSimoni Petro. 41 Iye wakatanga kutşaka mukoma wake aemho Simoni, akati kwaari, Tamuona Mesia (ukwo kunoti ngokukumucwa, Kristu.) 42 Naye wakamuunza kuna Jesu. Naapo Jesu amuringira wakati, Iwewe uri Simoni mukororo waJona; unozodaidzwa kuti Kefasi (ukwo kunoti ngokukumucwa, Ruware.)

43 Necimangwani wakado kenda Garire, akaona Firipu: naJesu wakati kwaari, Nditeere. 44 Zino Firipu walbva Betisaida, doropa revaigara Andreu naPetro. 45 Firipu wakatsaka Natanaeri, akati kwaari, Tamuona uwo waakanyora ndiye Mosi muzironzo nava-profeti, Jesu weNazareta, mukororo waJosefa. 46 Natanaeri wakati kwaari, Kungabvawo here ciro cakanaka muNazareta? Firipu wakati kwaari, Uya, uone. 47 Jesu wakaona Natanaeri eciuya kwaari, akati ndiye, Ringirai mu-

Israeri uwo ngegwinyliso usina kucenggedza mukati mjake! 48 Natanaeri wakati kwaari, Wandilita maziirenyi? Jesu wakapingura, akati kwaari, Dgepamberi Firipu asati akudaidza uri pashi pomuonde, ndakakuona. 49 Natanaeri wakapingura, akati, Rabi, Iwewe uri Mukororo waMjari, uri Mambo waIsraeri. 50 Jesu wakapingura, akati kwaari, Dgokuti ndati kwouri, kuti, Ndakakuona uripashi pomuonde, unotenda here? Unozoona ziro zikuru kupinda izi. 51 Wakati kwaari, Zirokwazo, zirokwazo, ndinoti kwouri, Munozoona dengga rakabeuka, nengirosi dzaMjari dzecikwira nokudzaka padera poMukororo womunhu.

**2** Nanggezuya recitatu kwaiapo mucado muKana reGarire, namai aJesu vaiapo. 2 NaJesu wakakokwawo nevadzidzi vake kumucado. 3 Naapo vini rapera, mai aJesu wakati kwaari, Avacina vini. 4 NaJesu wakati kwaari, Cinenyi ici kwendiri nokwouri, mai? awa rangu arisati raguma. 5 Mai ake akati kuvashandi, Kunyazi cinyini caanoronzwa kwomuri, itanyi. 6 Zino kwaiapo mabiya emapuwe matanhatu emvura kudai ngomuitiro wavaJuda wokushamba, rimje ngarimje rinoenera nhuvi mbiri kunyazi nhatu. 7 Jesu wakati kwavari, Zarisai mabiya ao nge-mvura. Navo vakaazarisa kuti penu. 8 Naye wakati kwavari, Ceral zino muende naro kune nhunge yomucado. Navo vakaenda naro. 9 Apo nhunge yomucado yaraira mvura iyo yakapindudzwa kuita vini, isikazi kuzia kuti rabva kuri (asi vashandi avo vakacera

mvura vaizla;) nhunge yomucado yakadaidza mukwambo. 10 Nayo yakati kwaari, Munhu weshe unobudisa kutanga vini rakanaka; naapo vanhu vamja kakurutu unobudisa iro risikazi kunasa kunaka: asi iwewe wakangwarira vini rakanasa kunaka metsa zino. 11 Uyu ndiwo wokutanga wemishamiso waakaita Jesu muKana re-Garire, wakapangidzira pamhene utende hwake, nevadzidzi vake vakatenda kwaari.

12 Dgesure kweizi wakadzaka kuenda Kaperanaume, iye namai ake, nevanununa vake, nevadzidzi vake; navo vakagarapo mazuva asikazi kuwanda.

13 Nepasika revaJuda raia pedo, naJesu wakakwira Jerusarema. 14 Naye wakaona mutemperi avo vaitengisa nombe nehwa nenjia, nevaitenganisana mare vecigara: 15 Naapo ainga aita mushwapu wehwisha, wavadzinga veshe kubva mutemperi, veshe makwai nenombe; wakadurura pashi mare yavaitenganisana, akapinduridza matafura avo; 16 Naye wakati kune avo vaitengisa njia, Dusai izi ziro kubva pano; musaita mhatso yaBaba angu mhatso yokutengisira. 17 Nevadzidzi vake vakacerecedza kuti kwakanyorwa, kuti, Kutsamnjirira ngendaa yemhatso yako kucandipedza. 18 Ndizo vaJuda vakamupingura, vakati kwaari, Muonisonyi wounotipangidzira, kwecioneka kuti unoita izi ziro? 19 Jesu wakapingura, akati kwavari, Putsal iri temperi, nangemazuva matatu ndinozorikaze. 20 Ndizo vaJuda vakati, Temperi iri rakaakiwa ngemakore ari makumi maro-

ngomuna namatanhatu, newe ungariaka here ngemazuva matatu? 21 Asi iye wakaereketa ngendaa yetemperi romuiri wake. 22 Ndizo apo amuswa kubva kwevakafa, vadzidzi vake vakacerecedza kuti wainga akaereketa ngeici, navo vakatenda zakanyorwa, nezwi iro raakaereketa Jesu.

23 Zino apo aia muJerusarema mupasika, mukudya, vazhinji vakatenda zina rake, veciona mishamiso yake yaakaita. 24 Asi Jesu aazi kudzhina kwavari, ngokuti iye waizila vanhu veshe, 25 Ze inga asikatami kuti munhu naumge apupurire kwaari ngendaa yomunhu; ngokuti iye waizila emene izo ziri mukati mnomunhu.

**3** Zino kwaiapo munhu wevaFarisi, zina rake ndiNikodemusi, mutongi wevaJuda: 2 Uyu wakauya kwaari usiku wakati kwaari, Rabi, Tinozia kuti iwewe uri mudzidzisi wakabva kuna Mjari: ngokuti akuna naumge unesimba rokuita iyi mishamiso younoita kwegu kuti Mjari anaye. 3 Jesu wakapingura, akati kwavari, Zirokwazo, zirokwazo, ndinoti kwouri, Kudai munhu asabarwa ngokwomudenga, aanga huoni umambo hwaMjari. 4 Nikodemusi wakati kwaari, Munhu ungaita mafarirwenyi apo aamusharuka? ungakona here kuti apotere ngokwecipiri mundani yamai ake, asarwe? 5 Jesu wakapingura, Zirokwazo, zirokwazo, ndinoti kwouri, kudai munhu asikabarwi ngemvura nangoMneya, aanasimba rokupotera muumambo hwaMjari. 6 Ukwo kunobarwa ngokwenyama kuri nyama; noukwo



kunobarwa ngokwoMneya kuri mneya. 7 Usashama ngokuti ndati kwouri, Kunotamika kuti ubarwe ngokwomudenga. 8 Dutu rinovuvuta perinoda, newe unozwa caungu caro, asi auzii perinobva, neperinoenda: zakadaro nokwavari veshe vanobarwa ngokwoMneya. 9 Nikodemusi wakapingura, akati kwaari, Izi ziro zigaita maitirenyi? 10 Jesu wakapingura akati kwaari, Iwewe uri mudzidzisi waIsraeri nei? auzizii here? 11 Zirokwazo, zirokwazo, ndinoti kwouri, tinoereketa cetinozia, nesu tinopupura ngeico cetakaona; nemgi amuashiri ucapupu hwedu. 12 Kudai ndamuronzera ziro zomunyika, nemgi musikazitendi, hino munozolita matenderenyi kudai ndecimuronzera ngeziro zomudenga? 13 Akuna naumge wakambokwira mudenga, kwegu uwo wakadzaka kubva mudenga, eya Mukororo womunhu, uri mudenga. 14 Nokudai ndiMosi wakamirudza nyoka mushango, ngokudaro kunotamika kuti Mukororo womunhu amirudzwe: 15 Kuti nokunyati ndiani unomutenda aone kupona kusikaperi.

16 Ngokuti Mjari wakaida nyika kudai, wakahina Mukororo wake wakabarwa ari ega, kuti veshe vanomutenda vasafa, asi vaone kupona kusikaperi. 17 Ngokuti Mjari aazi kutuma Mukororo wake munyika kuti airashe nyika; asi kuti nyika iponeswe ndiye. 18 Uwo unotenda kwaari aarashwi: asi uwo usikamutendi wakatorashwa nazino, ngokuti aazi kutenda zina rouwo wakabarwa ari ega Mukororo wa-

Mjari. 19 Uku ndikwo kurashwa, kuti kujeka kwakaguma munyika, nevanhu vakada cidima kakurutu kupinda kujeka, ngokuti mishando yavo yalnga yakashata. 20 Ngokuti nokunyati ndiani unolita zakashata unonyenya kujeka, naye, aauyi mukujeka, ngokuti mishando yake inozorambidzwa. 21 Asi uwo unolita zinegwinyiso unouya mukujeka, kuti mishando yake inga onekeswa kuti yakaitwa ndiMjari.

22 Ngasure kweizi Jesu wakauya nevadzidzi vake munyika yeJudia; naye wakagara apo nabo, ecibapatidza. 23 NaJohani wabapatidza muAinoni pasinde peSaremi, ngokuti yalapo mvura yakawanda: vakauya vakabapatidzwa. 24 Ngokuti Johani inga asati apakidzwa mutirongo. 25 Naapo kwakaapo kukanidzana pakati pevadzidzi vaJohani nomuJuda ngendaa yokuceneswa. 26 Nabo vakauya kuna Johani vakati kwaari, Rabi, uwo waia newe seri kweJordani, uwo wowakaita capupu ndiye, ringira, iye unobapatidza naveshe vanouya kwaari. 27 Johani wakapingura, akati, Munhu aanasimba rokuashira ciro nokuti ngeciri kuti asikazi kucipuka kubva mudenga. 28 Imngi mngemene mngakaita capupu ndini kuti ndakati, Andiriye akadi Kristu, asi kuti ndakatumga pamberi pake. 29 Iye unanyamuroorwa ndiye mukwambo; asi shamjari yomukwambo inoema yecimuzwa, inodakara ngendaa yezwi romukwambo: ndizo uku dakara kwangu kwazarisika. 30 Kunotamika kuti iye akuriswe, asi kuti inini nditsonge.

31 Uwo unouya ecibva mudenga uri padera pazeshe: iye unobva munyika ngowenyika, naye unoe-reketa zomunyika: iye unobva mudenga uri padera pazeshe. 32 Naye unopupura ngeizo zaakaona, nezaakazwa; akuna munhu unoshira capupu cake. 33 Uwo wakaashira ucapupu hwake, wakangwinyisisa kuti Mjari uri gwinyiso. 34 Dgokuti uwo waakatuma Mjari unoereketa mazwi aMjari; ngokuti iye aahini kwaari Mjeya ngokuedzanisa. 35 Baba vanoda Mukororo, navo vakaturira zeshe munyara dzake. 36 Iye unotenda Mukororo watoa nokupona kusikaperi; nouwo usikatendi Mukororo, aazooni kupona, asi ushungu hwaMjari hunondogara padera pake.

**4** Ndizo apo Mambo azia kuti vaFarisi vaingga vazwa kuti Jesu walita nokubapatidza vadzidzi vakawanda kupinda Johani. 2 (Asi Jesu emene aazi kubapatidza, asi vadzidzi vake vaibapatidza.) 3 Wakabva Judia, wakauyaze mugarire. 4 Kwaitamika kuti aparure ngomuSamaria. 5 Ndizo wakaguma kuguta revaSamaria rinzwi Sukari, pasinde pendau iyo yaakahina Jakobe kuno mukororo wake Josefa. 6 Zino cinyuka caJakobe calapo. Ndizo Jesu aingga aremba ngomuhambo wake waka-gara apo pacinyuka: kunonga raia awa recitanhatu. 7 Kwakaguma apo dzimai reSamaria kucera mvura: Jesu wakati kweriri, Ndipe ndimhe. 8 Dgokuti vadzidzi vake ingga vaenda kuguta kwootenga zokudya. 9 Dzimai reSamaria rakati kwaari, cinyini kuti iwewe,

uri muJuda ukumbire mvura yokumga kwendiri ndiri dzimai reSamaria? (Dgokuti vaJuda avai-yanl nevaSamaria.) 10 Jesu wakapingura, akati kweriri, kudai walzia iwewe, cipo caMjari, noku-ti ndiani uwo unokumbira kwou-ri, kuti, Ndipe, ndimhe, iwewe walzokumbira kwaari, naye walzo-kupa mvura yokupona. 11 Dzimai rakati kwaari, Mambo, auna cidzio cokucera ndico, necinyuka caka-dzama: ndizo mvura yokupona unayo pari? 12 Uri mukuru iwe-we here kuna baba edu Jakobe, uwo wakatipa ici cinyuka, naye wakamga kweciri emene, nevako-roro vake, nemitanga yake? 13 Jesu wakapingura akati kweriri, Nokunyati ndiani unomga kuneiyi mvura, unozozwaze nyota: 14 Asi uwo unomga kune mvura iyo ye-ndinozomupa inini, aacazozwize nyota mhera-narini; asi mvura iyo yendinozomupa inozoita cinyuka cemvura mukati mgame, ceci veru-kira kupona kusikaperi. 15 Dzimai rakati kwaari, Mambo ndipe mvura iyo, kuti ndisacazozwe nyota nokuti ndisacazouya panoze kucera. 16 Wakati kweriri, Enda, woodaidza mgame wako, muu-ye pano. 17 Dzimai rakapingura rikati, Andina mgame: Jesu wakati kweriri, Wanasa kuronza kuti, Andina mgame: 18 Dgokuti waimbola nevamuna vashano, nou-wo woutori naye zino aari mgame wakopi: ngeico waereketa gwinyiso. 19 Dzimai rakati kwaa-ri, Mambo, ndinoona kuti uri mu-profeti. 20 Madzibaba edu aka-dira kune iri dunhu, neimngimngi munoti, kuti, muJerusarema ndiyo ndau inosisa kudfirirapo. 21 Jesu

wakati kweriri, Dzimai, tenda ici, kuti nguva inouya apo amuzodiriri Baŋa kune iri dunhu kunyazi muJerusarema. 22 Imŋimŋi munodira comusikazii; isisu tinodira cetinozia: ngokuti ruponeso runobva kuvaJuda. 23 Ngokuti nguva inouya, nazino yaapano, apo vadiri vecakwadi vanozodira Baŋa ngoMŋeya necakwadi: ngokuti Baŋa vanotsaka vakadaro kumudira. 24 Mŋari ndiMŋeya, naavo vanomudira kunotamika kuti vamudire muMŋeya negwinyiso. 25 Dzimai rakati kwaari, Ndinozia kuti Mesia unouya, uwo unozwi Kristu: naapo auya unozotironzera ziro zeshe. 26 Jesu wakati kweriri, Ndini aye unoereketa newe.

27 Ngenguva iyi vadzidzi vake vakauya, navo vakashama ngokuti waiereketa nedzimai: kani zakanyardaro akuna wakati kwaari kuti, Unotsakenyi? nokuti, Unoereketa naro ngenyi? 28 Ndizo dzimai rakasia nhuvi yaro, rakahwirira kuguta, rikati kuanarume, 29 Uyai muone munhu uwo wandironzera zeshe zendakaita: uyu andiye here Kristu? 30 Ukaŋbuda kubva muguta, veluya kwaari. 31 Ngenguva iyo vadzidzi vake vakamunyengerera, veciti, Rabi, idya. 32 Asi wakati kwavari, Inini ndinakwo kudya kwomusikazii imŋimŋi. 33 Ndizo vadzidzi vakati umŋe kwoumŋeni, Uripo here munhu wamuunzira cokudya? 34 Jesu wakati kwavari, Kudya kwangu ngokwokuti ndiite kuda kwowakandituma, nokupedza mushando wake. 35 Amuronzi here kuti kwasara mŋedzi mirongomuna naapo kwoguma kukukura? Ringirai, ndinoti kwomuri, mirudza madziso enyu,

muringise muminda, ngokuti yacena nazino yosisira kukukurwa. 36 Nouwo unokukura unoashira misharo, nounounganidza micero yokupona kusikaperi. Kutu iye unosima naye unokukura vadakare pamŋepo. 37 Ngokudai cisana ici cinegwinyiso cokuti, Umŋe unokusha, noumŋeni unokukura. 38 Ndakamutuma kuti mukukure izo zomusikazi kushandira: vanhu vamŋeni vakashanda neimŋimŋi mŋakapoterera mumushando wavo.

39 Nevahu vazhinji bevaSamaria beguta iro vakamutenda ngenda yezwi redzimai, rerakapupura, kuti, Wandironzera zeshe zenda-kaita. 40 Ndizo apo vaSamaria vaingaga vaguma kwaari, vakamunyengerera kuti agare navo: naye wakagara apo mazuva mairi. 41 Nevazhinji vamŋeni vakamutenda ngenda yezwi rake remene: 42 Navo wakati, kune dzimai. Zino tinotenda, haiwa ngenda yokueraketa kwako, ngokuti taratamuzwa temene, nesu tinozia kuti uyu ngecakhadi uri Muponesi wenyika.

43 Ngasure kwemazuva mairi wakabva apo, akaenda muGarire. 44 Ngokuti Jesu emene wakupupura kuti muprofeti aaremeredzwi munyika yokwake. 45 Ndizo apo aguma muGarire, vaGarire vakamuashira, ngokuti beshe vaingaga vakaona zeshe zaakaita muJerusarema pamushongano wokudya: ngokuti ara navo vakaenda kumushongano wokudya.

46 Ndizo Jesu wakauyaze muKana reGarire, apo paa-kapindudza mvura kulta vini. Kwaiapo nduna yakatikuti yala nomukororo wayo wairwara muKaperanaume. 47 Naapo yazwa



kuti Jesu waingga abva Judia, aguma muGarire, yakaguma kwaari, yakamunyengerera kuti adzake aponese mukororo wayo, ngokuti waingga odo kufa. 48 Jesu wakati kweiri, Kutu musikaoni mioniso nemishamiso amuzotendi. 49 Nduna yakati kwaari Mambo, dzaka mjana wangu asati afa. 50 Jesu wakati kweiri, Enda, mukororo wako waponi. Munhuwo wakagonda izwi raakaereketa kwaari Jesu, naye wakaenda. 51 Kwakati acadzaka, varanda vake vakashongana naye, veciti, Mjana wako waponi. 52 Ndizo wakabvunza awa iro raakatanga kuitanane ndiro. Nayo vakati kwaari, Zuro ngeawa recinompe mutsarara wakamusia. 53 Ndizo baba akazia kuti ndiro awa raakaereketa Jesu kwaari kuti, Mukororo wako waponi: naye wakatenda, nevemhatsi yake yeshe. 54 Uyu ndiwoze mushamiso wechiri wakaita Jesu, apo aguma Garire abva Judia.

**5** Sure kweizi kwalapo mushongano wokudya wavaJuda, naJesu wakakwira Jerusarema.

2 Zino riripo muJerusarema gandwa ngepacimana cemakwai, rinodaidzwa ngokweciHeberu Betsaida, rinemaferere mashano. 3 Mukati mjaao mjalata vazhinji vaivwara, vala mapofu, nevaikumhina, nevakaputa, vecigarira kuzungunyiswa kwemvura. 4 Ngokuti ngomukuwo wakatikuti, ngirosi yaidzaka mugandwa nokuvundura mvura: ndizo nokunyati ndiani waitanga kupoterompo apo mvura yavundurwa waimhodyoswa nokunyati wala nenhenda yakaitawani. 5 Kwalapo munhu wakatikuti wala

nenhenda yake makore ari makumi matatu namasere. 6 Naapo Jesu amuona akaata, waizia kuti zino inga anazo mukuwo wakareba, wakati kwaari, Unoda kutambiswa here? 7 Nouwo waingga akaputa wakapingura kwaari, eciti, Mambo, andina munhu wokundidzakisira mugandwa apo mvura yovundurwa: asi mukuenda kwangu, umgeni unodzaka kunditangidza. 8 Jesu wakati kwaari, Miruka, utore manhi ako uhambe. 9 Pariipo munhuwo wakamhodyoka wakatora manhi ake akahamba. Dgezuva iro rala sabata. 10 Ndizo vaJuda vakati kwaari uwo wakamhodyoswa, Riri zuva resabata, akutenderwi kwouri kuti utware manhi ako. 11 Asi iye wakapingura, kuti, Uwo wakaita kuti ndimhodyoke ndiye wakati kwe ndiri, Tora manhi ako uhambe. 12 Vakamubvunza veciti, Ndiani munhu uwo wakati kwouri, Tora manhi ako, uhambe? 13 Asi uwo wakamhodyoswa aazi kuzia kuti ndiani: ngokuti Jesu inga aenda ngokuti mbungano huru yalapo pandau iyo. 14 Dgesure kweizi Jesu wakamuona ari mutemperi, naye wakati kwaari, Ringira, wakamhodyoswa, usacashaishaze, kuti ciro cakapinda kushata kune ico cisazokugumira. 15 Naapo munhu wakaenda, wakashuma kuvaJuda kuti ndiJesu wakamumhodyosa. 16 Dgendaa iyo vaJuda vakamutambudza Jesu, ngokuti wakaita izi ngezuva resabata. 17 Asi iye wakavapingura, Baba angu vanondoshanda metisa nazino, neni ndinoshanda. 18 Ndizo vaJuda vakapindisisa kutaka kumuuraya, ngokuti iye aazikugura sabata



kwega asi wakaronza kuti Mŋari waia Baŋa ake aemho, ecidziita unoedzana naMŋari.

19 Ndizo Jesu wakapingura, akati kwavari, Zirokwazo, zirokwazo, ndinoti kwomuri, Mukororo aana simba rokuita ciro ngo-kwake, asi caanoona Baŋa ecita: ngokuti izo zaanoita Baŋa, izize Mukororo unoitawo ngokudaro. 20 Ngokuti Baŋa vanomuda Mukororo, vanomupangidzira zesho zavanaita vemene: vanozomupangidzira mishando mikuru kune iyi, kuti mushame. 21 Ngokuti kudai ndi-Baŋa vanomusa avo vakafa, nokuita kuti vararame, Ngokudaroze Mukororo unoraramisa avo vaa-noda. 22 Ngokuti Baŋa avatongi munhu naumŋe, asi vakahina kutonga kwesho kuno Mukororo; 23 Kuti vesho varemerezedze Mukororo kudai ngeze vanoremerezedza Baŋa. Uwo usikaremerezedzi Mukororo, aamuremerezedze Baŋa uwo wakamutuma. 24 Zirokwazo, zirokwazo, ndinoti kwomuri, kuti iye unozwa izwi rangu, atende uwo wakandituma, waanakwo kupona kusikaperi, aacazopindi mukutongwa, asi wafarika kubva mukufa, kupotera mukupona. 25 Zirokwazo, zirokwazo, ndinoti kwomuri, kuti nguva inouya, nazino yaapano, apo vakafa vanozorizwa izwi roMukororo waMŋari, naavo vanozorizwa vanozopona. 26 Ngokuti kudai ndiBaŋa unokupona mukati mŋake, ngokudaro wakahina Mukororo kuti aanokupona mukati mŋake. 27 Naye wakahina kwaari simba rokugura ndaa, ngokuti iye uri Mukororo womunhu. 28 Musashama ngeici, ngokuti nguva inozouya

apo vesho vari mumalŋa vanozorizwa izwi rake; 29 Nayo vanozobudomŋo, avo vakaita zakanaka mukumuka kwokupona, naavo vakarovedzera kuita zakashata mukumuka kwokutongwa.

30 Andina simba rokuita ciro ngokwangu; kudai ngezendinozwa ngokudaro ndinotonga, nokutonga kwangu kuri kwakarurama, ngokuti anditsaki kuda kwangu, asi kuda kwouwo wakandituma. 31 Kudai ndecidzipupurira, ucapupu hwangu ahuna gwinyiso. 32 Uripo unhani unaita capupu ndini, neni ndinozia kuti ucapupu hwaanopupura ndini hunegwinyiso. 33 Imŋimŋi mŋakatuma kuna Johani, naye wakaita capupu kune ziro zegwinyiso. 34 Asi inini andiashiri ucapupu hunobva kumunhu asi ndinoereketa izi kuti muponeswe. 35 Iye wala rumvenu runobaka runojekisa, neimŋimŋi mŋakatenda kuti mudakare kanguva mukujeka kwake. 36 Asi inini ndinoucapupu hunopinda kugwinya kune hwaJohani: ngokuti mishando iyo yaakandipa Baŋa kuti ndilpedze, ndiyo mishando yendinoita, inopupura ndini. kuti Baŋa vakandituma. 37 NaBaŋa uwo wakandituma, wakaita capupu ndini. Amuzi kuto-ngozwa izwi rake nakamŋe, nokuti kutongona muemo wake. 38 Nemŋi amuna mazwi ake anogara mukati mŋenyu, ngokuti amuzi kutenda uwo waakatuma. 39 Tŋakisisai zinyoro, ngokuti mukati mŋazo munopinimidza kuti munokupona kusikaperi, nelzi, ndizo zinopupura ndini. 40 Nemŋi amutendi kuuya kwendiri, kuti muone kupona. 41 Andiashiri kulrikidwza kunobva kuvanhu. 42

Asi ndinomuzia kuti amuna rudo rwaMjari mukati mgenyu. 43 Inini ndakaguma ngezina raBaBa angu nemni amuzi kundilashira: kudai umneni ecizouya ngezina rake remene, iye munozomushira: 44 Mungaita matendere nyi imnini munoashira kuirikidzwa kubva kuno umneni noumneni, musikatsaki kuirikidzwa ukwo kunobva kuna Mjari ega? 45 Musapinimidza kuti inini ndinomezomutsa kuna BaBa: uripo umje unomezomutsa, ndiMosi, uwo womunogonda. 46 Ngokuti dai mjakatenda Mosi inga mjakatendawo nelini: ngokuti iye wakanyora ndini. 47 Asi kuti musikatendi zakanyorwa zake, mungazolita matenderenyi mazwi angu?

**6** Ngasure kweizi Jesu wakaa mbuka ruseri rwebahari reGarire, riri reTiberiasi. 2 Nembungano huru yakamuteera, ngokuti inga yaona mishamiso yaakaita kwavari vairwara. 3 NaJesu wakakwira mudunhu, umjo akagara pashi nevadzidzi vake. 4 Zino pasika, mushongano wokudya wevaJuda, rakakwedzera. 5 Ndizo Jesu amirudza madziso ake, aona kuti mbungano huru inga yeciuya kwaari, wakati kuna Firipu, Tinozotenga pari zingwa kuti ava vadye? 6 Asi wakaereketa izi kumuedza: ngokuti iye waizia caanozoita. 7 Firipu wakamupingura eciti, zingwa zepondo nomje azivakwanisi kuti uwo nouwo atore kadodoko. 8 Umje wevadzidzi vake, Andreu munuguna waSimoni Petro wakati kwaari. 9 Ciri pano cirumbgana cidoko cine zingwa zebare zishano nezi-

hove ziiri: kani izi zingadetserenyi kuvanhu vazhinji vakadai? 10 Jesu wakati. Garisai vanhu pashi. Kwaiapo pandau iyo mjenje wakawanda. Ndizo vanarume vakagara pashi, ingatei vala makumi emazana ari mazana mashano ngokuwanda. 11 Ndizo Jesu waktora zingwa; naapo abonga, wakakovanisa kuna avo vaingwa vakagara pashi; nezihove ngokudaro kudai ngokuda kwavo. 12 Naapo vaguta wakati kuvadzidzi vake, Unganidzai matsekeneswa ezakasara, kuti kusarashwa ciro. 13 Ndizo vakaunganidza, vakadzadza zitundu zirigumi naziiri ngematsekeneswa ezingwa zebare zishano ao akasara kuna avo vaingwa vadya. 14 Ndizo vanhu avo vaona uyu mushamiso waakaita, wakati, Ziokwazo uyu ndiye muprofeti uwo unouya munyika.

15 Ndizo apo Jesu ecizia kuti vodo kuuya kuti vamutore ngesimba kuti vamuite Mambo, wakatara ukaze kuenda kumutunhu ari ega.

16 Kwakati zuva rafira vadzidzi vake vakadzaka kubahari; 17 Wakakwira mungarava vakaa mbuka bahari kuenda Kaperanau-me. Inga kwaipa naJesu inga asati aguma kwavari. 18 Nemafulungu ebahari akakwira ngendaa yedutu guru raivuvuta. 19 Naapo vaingwa vabvua mamaera matatu kunyazi marongomuna vakaona Jesu ecihamba padera pebahari ecikwedzera kungarava, navo vakatya. 20 Asi wakati kwavari, Ndini hangu, musatya. 21 Ndizo vakamuashira mungarava, paripo ngarava yakaguma kunyika kwavaienda.

22 Necimangwani apo mbungano iyo yaingga yakaema ruseri rwebahari, yakaona kuti inga pasina ngarava imneni, yega imne iyo yevaingga vapotera kweiri vadzidzi vake, nokuti Jesu aazi kukwira pampepo nevadzidzi vake mungarava, asi kuti vadzidzi vake vaingga vaenda vari vega, 23 Kani kwakauya ngarava dzimneni dzakabva Tiberiasi dzikaguma pasinde pen dau apo pavakadya zingwa ngesure Mambo azibonga. 24 Ndizo apo mbungano yaona kuti Jesu inga pasina apapo, nokuti vadzidzi vake, yakakwirawo mungarava yakauya muKaperanaume yecimutsaka Jesu. 25 Naapo yaingga yamuona ruseri rwebahari, yakati kwaari, Rabi, waguma pano rini? 26 Jesu wakapingura, akati, Zirokwazo, zirokwazo, ndinoti kwomuri, amunditsaki ngokuti mna-kaona mishamiso asi ngokuti mna-kadya zingwa mukaguta. 27 Musashandira kudya ukwo kunopera, asi kudya ukwo kunogara mhera narini kwaanozomupa mukororo womunhu: ngokuti padera pake Baba Mhari wakaisa cioniso cake. 28 Naapo vakati kwaari, Tingaitenyi kuti tishande mishando ya-Mhari? 29 Jesu wakapingura, akati kwavari, Uyu ndiwo mushando waMhari kuti mutende uwo waakatuma. 30 Navo vakati kwaa-ri, Unoita muonisonyi kuti tione titende kwouri; unoshandenyi? 31 Madzibaba edu akadya mana mushango, kudai ngezezakanyorwa, Wakavapa cingwa cakabva mudenga kuti vadye. 32 Ndizo Jesu wakati kwavari, Zirokwazo, zirokwazo, ndinoti kwomuri, andiye Mosi akadi wakamupa cingwa

cakabva mudenga, asi Baba angu ndiye unomupa cingwa cegwinyiso cinobva mudenga. 33 Ngokuti cingwa caMhari ciri uwo wakabva mudenga, unohina kupona kunyika. 34 Ndizo vakati kwaari, Mambo, tipei ngenguva dzeshe ici cingwa. 35 Jesu wakati kwavari, Inini ndiri cingwa cokupona, aye unouya kwendiri aatongozwi nza-ra, nouwo unotenda kwendiri aatongozwi nyota. 36 Asi ndakati kwomuri kuti mna-kaona, asi amuzi kunditenda. 37 Ueshe avo aanondipa Baba vanozouya kwendiri, nouwo unouya kwendiri andizomurashi akadi. 38 Ngokuti andizi kudzaka kubva mudenga kuti ndiite kuda kwangu asi kuda kwouwo wakandituma. 39 Uku ndikwo kuda kwowakandituma, kuti veshe vaakandipa andizorashikirwi naumpe kwavari, asi kuti ndivamuse ngomushi wokupera. 40 Ngokuti uku ndikwo kuda kwaBaba angu, kuti munhu weshe unoringira Mukororo noku-tenda kwaari unoanokupona kusikaperi, neni ndinozomumusa ngomushi wokupera.

41 Ndizo vaJuda vakavuruvuta ndiye, ngokuti wakati, Inini ndiri cingwa ico cakabva mudenga. 42 Navo vakati, Uyu andiyepi here Jesu mukororo wa-Josefa, baba namai ake vetinozia? Zino unoita maereketerenyi, kuti, Ndakabva mudenga? 43 Jesu wakapingura akati kwavari, Musavuruvuta mukati mpenyu. 44 Akuna naumpe unesimba rokuuya kwendiri, kudai Baba wakandituma asamukweya, neni ndinozomumusa ngomushi wokupera. 45 Kwakanyorwa ngava-

profeti, kuti, Ueshe vanozodzidzi-  
swa ndiMnari. Ndizo munhu  
weshe wakazwa, ecidzidza, ndi-  
BaBa, unouya kwendiri. 46 Sandi-  
kwo kuti uripo wakamuona BaBa,  
kwega iye wakabva kuna Mnari,  
ndiye wakamuona BaBa. 47 Ziro-  
kwazo, zirokwazo, ndinoti kwo-  
muri, iye unotenda waanokupona  
kusikaperi. 48 Inini ndiri cingwa  
cokupona. 49 MadziBaBa enyu va-  
kadya mana mushango, vakafa.  
50 Ici ndico cingwa cinobva mu-  
denga kuti kunyazi ndiani kwo-  
muri unocidya, aacafi. 51 Inini  
ndiri cingwa cokupona cakabva  
mudenga; kunyazi ndiani unocidya  
ici cingwa unozorarama kusika-  
peri: necingwa cendinozohina ciri  
muiri wangu, wendinozohina kuti  
uite kupona kwenyika.

52 Ndizo vaJuda vakaitirana  
hasha pakati pavo, velti, Mu-  
nhuyu ungatiita mahinirenyi mui-  
ri wake udyiwe? 53 Ndizo Jesu  
wakati kwavari, Zirokwazo, zi-  
rokwazo, ndinoti kwomuri, Ku-  
dai musikadyi muiri wo-  
Mukororo womunhu, musikamni  
ngazi yake amuna kupona mukati  
mnyenyu. 54 Iye unodya muiri  
wangu, amne ngazi yangu, waano-  
kupona kusikaperi, neni ndinozo-  
mumusa ngomushi wokupera. 55  
Ngokuti muiri wangu uri kudya  
aemho, nengazi yangu iri kumja  
aemho. 56 Iye unodya muiri wa-  
ngu, amne ngazi yangu, unogara  
mukati mnyangu, neni ndinogara  
mukati mnake. 57 Kudai ndi-  
BaBa vanopona vakandituma, neni  
ndinopona ndiBaBa, ngokudaro  
iye unondidya, ndiye unozopona  
ndini. 58 Ici ndico cingwa caka-  
dzaka kubva mudenga cisikazi

kudai ngecakadya madziBaBa enyu,  
vakafa: iye unodya cingwa ici uno-  
zopona kunoti narini. 59 Waka-  
reketa izi ecidzidzisa ari mu-  
mhatso yokudira muKaparanau-  
me.

60 Ndizo vazhinji vevadzidzi  
vake apo vazwa vakati, Iri izwi  
igukutu; ndiani unokona kurizwa?  
61 Asi apo Jesu ecizila mukati  
mnake kuti vadzidzi vake vakamu-  
vuruvutira ngeici, wakati kwavari,  
Ici cinomupumhunisa here? 62  
Mungadini dai mnejona Muko-  
roro womunhu ecikwira apo paala  
pakutanga? 63 NdiMneya uno-  
hina kupona, nyama ainyuri ciro:  
mazwi endakaereketa kwomuri ari  
mneya, nokurarama. 64 Asi va-  
ripo vamneni pakati penyu vasika-  
tendi. Ngokuti kubvira pakuta-  
nga, Jesu waindozila kuti ngava-  
nani avo vasikatendi, nokuti ndiani  
unozomupira. 65 Naye wakati,  
Ngeliyi ndaa ndakaereketa kwo-  
muri, ndeciti, Apana unesimba ro-  
kuuya kwendiri kuti asikazi kuri-  
puwa ndiBaBa.

66 Kubvira ngouyu mukuwo va-  
zhinji vevadzidzi vake vakahwirira  
sure, avazi kucazohamba naye. 67  
Ndizo Jesu wakati kuna varigumi  
navairi, Munoda kuendawo here?  
68 Simoni Petro wakamupingura,  
Mambo, tingaenda kunani? mazwi  
okupona kusikaperi ari kwouri.  
69 Nesu takatenda, tinozia kuti  
iwewe uri Wakacena waMnari.  
70 Jesu wakamupingura. akati,  
Andizi kumutsanangura here mu-  
rigumi navairi, noumne wenyu uri  
diaboro? 71 Asi wakaereketa ndi-  
Judasi Isikarioti, mukororo wa-  
Simoni: ngokuti ndiye waizomu-  
pira, ari umne wevarigumi navairi.



**7** Dgesure kweizo Jesu wakahamba muGarire, ngokuti inga asikacadi kuhamba muJudia, ngokuti vaJuda vaitsaka kumurraya. **2** Zino mushongano wokudya kwevaJuda, mushongano wokugara mumicaca, waia pasinde. **3** Ndizo vanuguna vake vakati kwaari, Ibva pano uende muJudia, kuti vadzidzi vakoze vaone mishando yako yunoita. **4** Dgokuti akuna munhu unolta ciro ngokufishika, ecitsaka kuti aziikane pamhene. Kudai wecilita izi ziro dzipangidzire kuna veshe vomunyika. **5** Dgokuti vanuguna vake inga vasadi vatenda kwaari. **6** Ndizo Jesu wakati kwavari Dguva yangu aisati yaguma akadi, asi nguva yenyu yakandonaka mukowo weshe. **7** Nyika ainga munyenyi akadi, asi inondinyenya inini ngokuti ndinopupura ndiyo, kuti mishando yayo yakashata. **8** Kwirai imnjimji kumushongano uyu wokudya: inini andikwiriyo zino kumushongano uyu wokudya; nguva yangu aisati yaguma. **9** Apo aereketa izi kwavari wakagara muGarire.

**10** Asi apo vanuguna vake vainga vakwira kumushongano wokudya, wakakwirawo, haiwa pamhene, asi ngokufishika. **11** Ndizo vaJuda vakamutšaka mumushongano wokudya, vakati, Umboripari? **12** Kwaiapo kuvuruvuta kukurutu pakati pembungano ngendaa yake: vamneni vakati, Uri munhu kwaye, asi vamneni vakati, Haiwa asi unopaukisa mbungano. **13** Asi apana munhu wakaereketa ndiye pamhene ngendaa yokutya vaJuda.

**14** Asi apo mushongano woku-

dya waapakati, Jesu wakakwira mutemperi wakadzidzisa. **15** Ndizo vaJuda vakashama veciti, Uyu unolta maziirenyi zinyoro, asikazi kudzidza? **16** Ndizo Jesu wakavapingura, akati, Kudzidzisa kwangu angokwangu akadi, asi ngokwouwo wakandituma: **17** Kunyazi ndiani unoda kuita kuda kwake, unozozia ngendaa yecidzidziso, kuti cinobva kuna Mjari here nokuti ndinodziereketera. **18** Iye unodziereketera unotšaka kuirikidzwa kwake; asi iye unotšaka kuirikidza uwo wakamutuma, ndiye uri wegwinyiso, apana kusikarurami mukati mñake. **19** Mosi aazi kumupa here zironzo, asi apana pakati penyu unongwarira zironzo. Munotšakirenyi kundluraya? **20** Mbungano yakapingura, Unedimoni; ndiani unotšaka kukuuraya? **21** Jesu wakavapingura, akati kwavari, Ndakaita mishando umñe, nemñi mñeshe mñakashama. **22** Dgeiyi ndaa Mosi wakamupa kuti mucekwe (asi angokwa Mosi akadi, asi kwakabva kumadzišaba,) Nemñi ngezuva resabata munoceka munhu. **23** Kudai munhu eclashira kucekwa ngezuva resabata, kuti cironzo caMosi cisagurwa, hino munonditsenekera ngenyi ngokuti ndakamhodyosa munhu ngesabata? **24** Musatonga ngokuoneka kwokubanzi, asi tongai kutonga kwakwo.

**25** Ndizo vamneni vakatikuti veJerusarema vakati, Uyu andiyepi here uwo wevaitsaka kuuraya? **26** Ringirai unoereketa pamhene, nabo avaereketi ciro kwaari. Uatongi avazii here ngecakwadi kuti uyu ndiKristu. **27**

Asi uyu tinomuzia paanobva: asi apo Kristu ozouya apana naumhe unozozia kuti unobva pari. 28 Ndizo Jesu wakadaidzira ari mutemperi ecidzidzisa, akati, Munondizia, munoziaze pendinobva, neni andizi kuuya ngokwangu, asi aye wakandituma unegwinyiso, nemyi amumuzii. 29 Asi inini ndinomuzia; ngokuti ndinobva kwaari, naye wakandituma. 30 Ndizo vakatsaka kumubata, asi apana naumhe wakaisa nyara padera pake, ngokuti nguva yake inga isati yaguma. 31 Nevazhinji vembungano vakatenda kwaari, vakati, Apo Kristu ouya unozokona here kuita mishamiso inopinda iyi yakaitwa ngouyu munhu? 32 UaFarisi vakazwa kuti mbungano yalvuruvuta ngeizi ziro ndiye; nevapristi vakuru nevaFarisi vakatuma nhunge kuti dzimubate. 33 Ndizo Jesu wakati, Inguva doko ndicinemni, neni ndinozoenda kwouwo wakandituma. 34 Munozonditaka, asi amuzondioni: nependiri, amuna simba rokugumapo. 35 Ndizo vaJuda wakaereketa pakati pavo, veciti, unozoenda kuri kwetisikazomuoni isisu? unozoenda here kune vakaparadzika vevaGreki, nokuvadzidzisa vavaGreki? 36 Rinotinyi izwi iri rakaereketa, kuti, Munozonditaka, asi amuzondioni, nependiri amuna simba rokugumapo?

37 Dgezuva rokupedzisira, mushi mukuru womushongano woku-dya, Jesu wakamiruka, akadaidzira, eciti, Kunyazi ndiani une nyota ngaaube kwendiri, amhe 38 Iye unotenda kwendiri, kudai ngokuronza kwezinyoro, ndwizi dze-

mvura yokupona dzinozopopoma kubva mundani mheke: 39 Asi wakaereketa ici ngendaa yoMheya wavanozoashira avo vanotenda kwaari: ngokuti Mheya wainga usati wainwa, ngokuti Jesu inga asati airikidzwa. 40 Ndizo vamneni vembungano, apo vazwa aya mazwi, vakati, Dgecakhadi uyu ndiye Muprofeti: 41 Vamneni vakati, Uyu ndiye Kristu. Asi vamneni vakati, Kristu ungabva Garire here? 42 Zinyoro azironzi here kuti Kristu unozobva kurudzi rwaDavida, nokubva Beterehema, muguta apo paaigara Davida? 43 Ndizo kwaiapo kuparadzana pakati vembungano ngendaa yake. 44 Vamneni kwavari vakada kuti vamuabate, asi apana wakaisa nyara padera pake.

45 Ndizo nhunge dzakauya kuvapristi vakuru nevaFarisi, nabo vakati kwedziri, Mhareka kuuya naye ngenyi? 46 Nenhunge dzakapingura, Narini, akuna munhu wakamboereketa kudai ngouyu munhu. 47 Ndizo vaFarisi vakadzipingura, Nemniwo mngacengedzerwa here? 48 Uripo here wevatongi nokuti wevaFarisi wamutenda? 49 Asi iyi mbungano isikazii zironzo yakatukwa. 50 Nikodemusi ari umhe wavo, (uwo wakaguma kwaari pakutanga,) wakati kwavari, 51 Zironzo zedu zinorasha here munhu, tisati tamuzwa, nokuzia caanolta? 52 Ukamupingura, vakati kwaari, Newe auri weGarire here? Tsakisisa uone, ngokuti akuna muprofeti unobva Garire.

53 Nomunhu weshe wakapararira kuenda kumhatso yake.

**8** NaJesu wakaenda kudunhu raMaorive. 2 Mangwanani maishi wakauyaze mutemperi, nevanhu veshe vakauya kwaari; naye wakagara pashi, akavadzidzisa. 3 Uanyori nevaFarisi vakaunza kwaari dzimai rakabatwa reciomba, naapo vainga varigadzika pakati, vakati kwaari, 4 Mudzidzisi, iri dzimai rakabatwa mu kuomba, reciomba aemho. 5 Zino Mosi wakatipanga muzironzo kuti vakadaro vapondwe ngamapuwe: asi iwewe unotinyi? 6 Asi ici vakaereketa vecimuedza, kuti vaone cokumuparise ndaa ndico. Asi Jesu wakakotama pashi, akanyora ngecinwe pamavu. 7 Asi apo vaa ngira kumubvunzisisa, wakadziruramisa, akati kwavari, Iye usina kushaisha pakati penyu, ngaa tange kukandira buwe kumuponda. 8 Wakakotamaze pashi, akanyora pamavu. 9 Navo vakazwa, vecitirwa ndaa ngemhumba dzavo, vaka buda umne ngaumne, kubvira kuvasharuka metsa kuvadoko: naJesu wakasara ari ega nedzimai rakagara pakati. 10 Naapo Jesu ainga adziruramisa, wakaona dzimai rega akati kweriri, Dzimai, vari pari avo vakakuitira ndaa? Apana here wakakurasha? 11 Rakati, Akuna, Mambo, Jesu wakati kweriri, neni andikurashi: enda, usacazoshalshaze.

12 Ndizo Jesu wakaereketaze kwavari, eciti, Inini ndiri kujeka kwenyika: aye unonditeera, aazohambi mucidima, asi unozoa nokujeka kwokupona. 13 Ndizo vaFarisi vakati kwaari, Unodzipupurira: ucapupu hwako ahuna gwinyiso. 14 Jesu wakapingura, akati kwavari, Nokunyati ndecidzi-

pupurira ucapupu hwangu hune gwinyiso, ngokuti ndinozia pendakabva, nependinoenda: asi imnini amuzii pendakabva, nependinoenda. 15 Imnini munotonga ngokwenyama, inini anditongi munhu. 16 Kani ndecinyatonga, kutonga kwangu kune gwinyiso, ngokuti andiri ndega akadi, asi inini ndiri pampepo naBaba vakandituma. 17 Kwakanyorwa muzironzo zenyu kuti ucapupu hwanhu vairi hune gwinyiso. 18 Inini ndiriye unodzipupurira, naBaba vakandituma ivo vanopupura ndini. 19 Ndizo vakati kwaari, Uri pari Baba ako? Jesu wakapingura, akati, Imnini amundizii, nokuti Baba angu; dai mngaindizia, mngai-zozia Baba anguze. 20 Jesu wakaereketa aya mazwi muugaro hwezipo, ecidzidzisa ari mutemperi: apana wakamubata ngokuti nguva yake inga isati yaguma.

21 Ndizo wakati ze kwavari, Inini ndinoenda, nemni munozonditshaka nemni munozofira muzishaishi zenyu: napendinoenda amuna simba rokuuya apo. 22 Ndizo vaJuda vakati, unodziuraya here? ngokuti unoti, Pendinoenda, imnini amuna simba rokuuya apo. 23 Wakati kwavari, imnini muri vepashi, inini ndinobva mudenga: imnini muri venyika iyi, asi inini andiri wenyika iyi akadi. 24 Ndizo ndakati kwomuri kuti munozofira muzishaishi zenyu: ngokuti kudai musikatendi kuti ndiri aye munozofira muzishaishi zenyu. 25 Ndizo vakati kwaari, Uriani iwewe? Jesu wakati kwavari, Ndiri uwo wendakamuronzera mukutanga. 26 Ndine zakawanda zokuereketa ndimni nokutonga: asi iye waka-

ndituma uri gwinylso; neni ndi-noereketa kunyika izo zandakazwa kubva kwaari. 27 Avazikuzia kuti waiereketa kwavari ndiBaba. 28 Ndizo Jesu wakati kwavari, Apo mjazomukwidza Mukororo wo-munhu, naapo munozozia kuti inini ndiri aye, nokuti anditi ciro ndemene, asi kudai ngezendaka-dzidziswa ndiBaba, izi ndizo zendi-noereketa. 29 Nouwo wakandituma undori neni: aazi kundisia ndega; ngokuti ndinoita mukuwo weshe izi zinomudakadza. 30 Acaereketa, vazhinji vakatenda kwaari.

31 Ndizo Jesu wakati kuna avo vaJuda vakatenda kwaari, Kudai mjecigara mumazwi angu ngegwinylso muri vadzidzi vangu. 32 Nemni munozozia gwinylso negwinylso rinozomusunhura. 33 Vakamupingura, Isisu tiri vorudzi rwaAbraham, atizi kumboitwa varanda ngomunhu naumge: unodaro ngenyi kuti munozosunhura? 34 Jesu wakapingura, Zirowazo, ndinoti kwomuri, kuti, nokunyati ndiani unoita kushaisha, urimuranda wokushaisha. 35 Nomuranda aagari mumhatso mhera narini, asi mukororo unogaremgo mhera narini. 36 Ndizodai Mukororo ecizomusunhura, munozosunhurwa aemho. 37 Ndinozia kuti Imnimni muri vorudzi rwaAbraham: asi munotsaka kundiuraya, ngokuti izwi rangu arina ndau mukati mgenyu. 38 Inini ndinoereketa izo zendakaona kuna Baba angu, nemniwo munoita zemnakazwa kuna Baba enyu. 39 Vakamupingura, vakati kwaari, Baba edu ndiAbraham. Jesu wakati kwavari, Kudai mjaia vana vaAbraham, mjaizoita mishando

yaAbraham. 40 Asi zino munotsaka kundiuraya ndiri munhu wakaereketa gwinylso kwomuri, iro rendakazwa kuna Baba angu: Abraham aazi kuita cakadai. 41 Imnimni munoita mishando yaBaba enyu. Vakati kwaari, Isisu atizi kuBarwa ngokuomba, tinaBaba umge ndiMnari. 42 Jesu wakati kwavari, Kudai Mnari ala Baba enyu, mungandida: ngokuti ndakabuda ndecibva kuna Mnari; ngokuti andizi kuuya ngokwangu, asi iye wakandituma. 43 Amuzwisisi ngenyi kuereketa kwangu? ngokuti amuna simba rokuzwisisa izwi rangu. 44 Imnimni muri vaBaba enyu Diaboro, nokuemura kwaBaba enyu munoda kukulta. Uwo wala muurayi kubvira pakutanga, naye aazi kuema mugwinylso, ngokuti gwinylso amuna mukati mnake, apo eciereketa manyepo, unodziereketera, ngokuti iye uri munyepi naBaba emanepo. 45 Asi ngokuti inini ndinoereketa gwinylso amunditendi. 46 Ndiani kwomuri ungandishova ngokushaisha? Kudai ndeciereketa gwinylso amunditendi ngenyi? 47 Iye uri waMnari unozwa mazwi aMnari; ngeiyi ndaa imnimni amundizwi, ngokuti amuri waMnari akadi. 48 VaJuda vakapingura, vakati kwaari, Atinasi kuronza here kuti uri muSamarita, newe unedimoni? 49 Jesu wakapingura, Inini andina dimoni, asi ndinoremereza Baba angu, nemni munondinyenyeredza. 50 Asi anditsaki kuirikidzwa kwangu, uripo umge unotsaka, nounotonga. 51 Zirowazo, zirowazo, ndinoti kwomuri, kunyazi ndiani unogwarira mazwi angu, aatongo-



zooni kufa. 52 UaJuda vakati kwaari, Zino tinozia kuti unedimoni. Abrahama wakafa, nava-profeti; newe unoti, Kunyazi ndiani unongwarira mazwi angu, aatongozozwi kufa. 53 Iwe-we uri mukuru here kuna baba edu Abrahama, wakafa, nevaprofeti vakafa: unodziita anani? 54 Jesu wakapingura, Kudai ndecidziirikidza, kuirikidzwa kwangu kuri kusina shwiro: ndiBaba angu anondirikidza, vomunoti ndivo kuti vari Mjari wenyu: 55 Nemji amuzikuvazia, asi inini ndinovazia, nokudai ndeciti, Andivazii, ndingaita munyepi kudai ndimji: asi ndinovazia, ndinongwarira mazwi avo. 56 Abrahama baba enyu akadakara ngokuriona zuva ranggu; naye wakariona, akadakara. 57 Ndizo vaJuda vakati kwaari, ausati waane makore ari makumi mashano, newe wakaona Abrahama here? 58 Jesu wakati, kwaari, Zirokwazo, zirokwazo, ndinoti kwomuri, Abrahama asati aifarwa, ndaindolapo. 59 Ndizo vakatora mapuwe kuti vamuponde, asi Jesu wakangarangaka, akabuda kubva mutemperi.

**9** Kwakati ecipinda wakaona munhu waia bofu kubvira mukubarwa kwake. 2 Nevadzidzi, vake vakamubvunza, veciti, Mudzidzisi, ndiani wakashaisha, uyu munhu kunyazi vafari vake, kuti aifarwe ari bofu? 3 Jesu wakapingura, akati, Uyu munhu aazi kushaisha kunyazi vafari vake, asi kwokuti mishando yaMjari ioniswe ndiye. 4 Kunotamika kuti tishande mishando youwo wakandituma acimasikati: ngokuti usi-

ku hunouya apo apana ungazokona kushanda. 5 Apo ndicindori munyika, ndiri kujeka kwenyika. 6 Apo ainga aereketa izi, wakapfira pamavu, wakakanya matope ngamata, wakadzodza madziso aro ngedope. 7 Wakati kweriri, Enda, ushambe mugandwa reSiroma (ngokukumucwa kunoti, Wakatumya.) ndizo wakaenda, akashamba, wakauya oona. 8 Ndizo avo vakaakirana naye, naavo vaimuona kare, kuti waia rombe, vakati, Uyu andiyepi here uwo walgara ecipemha? 9 Uamjeni vakati, Ndiye; vamjeni vakati, Haiwa, asi unoto-dzana naye. Asi iye wakati, Ndiriye: 10 Ndizo vakati kwaari, Madziso ako akaita mapembendzirwenyi? 11 Wakati, Munhu unozwi ndiJesu wakaita matope, akadzodza madziso angu, akati kwendiri, Enda Siroma, ushambe: ndizo ndakaenda, ndikashamba, ndikaona. 12 Nao vakati kwaari, Uri pari? Iye wakati, Andizii.

13 Ndizo vakamuunza kuvaFarisi aye waia bofu. 14 Raja sabata ngezuva iro apo Jesu akaita matope akapembendudza madziso aro. 15 Ndizo vaFarisi vakahwirinzira kumubvunzaze, kuti wakaita mapembendzirwenyi. Asi wakati kwavari, Iye wakaisa matope pamadziso angu, neni ndakashamba, zino ndinoona. 16 Ndizo vamjeni vavaFarisi vakati, Uyu munhu aabvi kuna Mjari akadi, ngokuti aangwariri sabata. Uamjeni vakati, Munhu uri mushaishi ungaita maitirenyi iyi mishamiso? Kwakaapo kuparadzana mukati mjavu. 17 Ndizo vakatize kune bofu, Unotinyi ndiye iwewe, ngendaa yokuti wakape-

mabenudza madziso ako? Naye wakati, Uri muprofeti. 18 Ndizo vaJuda avazi kutenda kuti ndiye wala ari bofu, nokuti wakapembenuudzwa, metsa vakadaidza vabari vovakapembenuudzwa. 19 Navo vakavabvunza, veciti, Uyu uri Mukororo wenyu here, womunoti, kuti, wakaŋarwa ari bofu? Ndizo zino unoita maonerenyi? 20 Ndizo vabari vake vakapingura vakati, Cetinozia ngecokuti uyu uri Mukororo wedu, nokuti wakaŋarwa andori bofu: 21 Hino kuti unoita maonerenyi atizii, nokuti ndiani wakapembenuudza madziso ake, atizii: mubvunzenyi, wabva muzero, unozo dziereketera. 22 Vabari vake vakaronza izi ngokuti vaitya vaJuda ngokuti vaJuda inga vakatenderana kuti kunyazi ndiani unozomutenda kuti iye uri Kristu, unozodzingwa kubva kumhatso yokudira. 23 Dgeiyi ndaa vabari vake vakati, Wabvo muzero, mubvunzenyi. 24 Ndizo vakamudaidza ngokweciiri uwo wala bofu, vakati kwaari, Irikidza Mjari iwewe, isisu tinozia kuti uyu munhu uri mushaishi. 25 Ndizo iye wakapingura, Kunyazi ari mushaishi nokuti asiri, andizii; asi ciro cimne cega cendinozia, ngecokuti inini ndala bofu, zino ndinoona. 26 Ndizo vakati kwaari, wakaiteenyi kwouri? wakaite mapembenudzirenyi madziso ako? 27 Iye wakapingura, Ndatomuronzera, asi amuzi kutenda: munoda kucaita mazwirenanyi? Nemnjiwo munoda here kuita vadzidzi vake? 28 Ivo vakamutuka, veciti, Iwewe uri mudzidzi wake, asi isisu tiri vadzidzi vaMosi. 29 Tinozia kuti Mjari wakaereketa kuna Mosi, asi

uyu munhu, atizii paanobva. 30 Munhu uyu wakapingura, akati kwavari, Iri igumo kuti amuzii paanobva, kanihai wakapembenuudza madziso angu? 31 Tinozia kuti Mjari aazwi vashaishi: asi kunyazi ndiani unomuremeredza, nokuita kuda kwake, iye unomuzwa. 32 Kubvira mukutanga akuzi kumbozwika kuti munhu wakambo pembenudza madziso owakaŋarwa ari bofu. 33 Kudai uyu munhu asiri unobva kuna Mjari, aangaanaro simba rokuita ciro. 34 Ukamupingura vakati kwaari, Iwewe wakaŋarwa aemho mukushaisha, newe unotidzidzisa here? vakamudzinga kubanzi.

35 Jesu wakazwa kuti vainga vamudzinga kubanzi, amuona, wakati, Unotenda here Mukororo waMjari? 36 Naye wakapingura akati, Uriani, Mambo, kuti nditende kwaari? 37 Jesu wakati kwaari, Wamuwona, ndiyeze unoreketa newe. 38 Wakati, Mambo, ndinotenda. Naye wakamudira. 39 NaJesu wakati, Ndakauyira kutonga munyika muno, kwokuti vasikaoni vaone, nevanoona vaitwe mapofu. 40 Navamjeni vevaFarisi, avo vaia naye vakazwa izi, vakati kwaari Nesuwo tiri mapofu here? 41 Jesu wakati kwavari, Kudai mjaia mapofu, amusaizoa-no kushaisha: asi zino munoti, Tinoona, ndizo kuishaisha kwenyu kunondogara.

**10** Ziokwazo, ziokwazo, ndinoti kwomuri, Uwo usikapindi ngepacimana mudanga remakwai, asi ecikwira ngeimjeni njira, iye uri mbava nedzongoni. 2 Asi uwo unopinda ngepacimana

ndiye uri muushi wemakwai. 3 Kwaari murindi unomubeurira, nemakwai anozwa izwi rake, unodaيدا makwai ake ngemazina ao, aabudise. 4 Naapo aabudisa ake, unoatungamirira, nemakwai anomuteera, ngokuti anorizia izwi rake: 5 Asi aazoteeri mupara, kani anozomutiza, ngokuti aazili izwi romupara. 6 Jesu wakaereketa uyu muedzaniso kwavari; asi avazi kuzwisisa izo zaakaereketa kwavari.

7 Ndizo Jesu wakaereketa kwavari, Zirokwazo, zirokwazo, ndinoti kwomuri, inini ndiri cimana cemakwai. 8 Ueshe vakatanga pamberi pangu vari mbava nemadzongoni: asi makwai aazi kuvazwa. 9 Inini ndiri cimana: kunyazi ndiani unopinda ndini, unozoponeswa unozopotera, unozobuda, aone kudya. 10 Mbava inouya kwegu kuba, nokuuraya, nokuparadza: inini ndakauya kuti vaone kurarama, vakuone kakurutu. 11 Inini ndiri muushi wakanaka; muushi wakanaka unoisira pashi kupona kwake ngepamsoro pemakwai. 12 Asi iye unoshanda kuti aone mutuso, asiri muushi akadi, uwo makwai asiri ake akadi, unona tika reciuya, unosia makwai, unotiza, netika rinoabvuka nokuparadza. 13 Unotiza ngokuti uri unoshandira mutuso, aasongwi mnyoyo ngemakwai. 14 Inini ndiri muushi wakanaka, neni ndinoazia angu, naanguwo anondizia, 15 Kudai ngezaanondizia Baba, zakadaro neniwo ndinovazia Baba, neni ndinoisira pashi kupona kwangu ngepamsoro pemakwai. 16 Ndinao amneni makwai, asiri eiri dangga, naoze kunotamika kuti

ndiaunze, nao anozozwa izwi ranggu, nao anozoita dangga rimnero nomuushi umgewo. 17 Dgeiyi ndaa Baba vanondizia, ngokuti ndinoisira pashi kupona kwangu, kuti ndikutoreze. 18 Apana munhu unokutora kubva kwendiri, asi ndino kuisa pashi ngokwangu. Ndine simba rokukuisa pashi, ndine simba rokukutoraze. Uyu mupango ndakaupuwa ndiBaba angu.

19 Kwaiapo kuparadzana pakati pevaJuda ngendaa yemazwi aya. 20 Nevazhinji vavo vakati, Une dimoni, unopenga; munomupurutanirenyi? 21 Uamneni vakati, Aya mazwi andiopi ounomuka nedimoni: dimoni ringapembenudza madziso ebofu here?

22 Dgouwo mukuwo kwaiapo mushongano wezituro muJerusarema, paia pacando. 23 NaJesu wakahamba mutemperi, muberere raSoromona. 24 Ndizo vaJuda vakamuunganira, vakati kwaari, Unotiita garirembo metsa rini? Kutl uri Kristu, tironzere pamhene. 25 Jesu wakavapingura, Ndakamuronzera, nemni amutendi: mishando yendi noita ngezina raBaba angu, inopupura ndini. 26 Kani imnigimni amutendi ngokuti amurivo akadi vemakwai angu. 27 Makwai angu anozwa izwi ranggu, neni ndinoazia, nao anonditeera, 28 Ndinoapa kupona kusikaperi, nao aazofi narini, ze akuna unoabvuka kubva munyara yangu. 29 Baba angu uwo wakandipa ao, uri mukuru kwavari veshe, apana naumge unesimba rokuabvuka kubva munyara yaBaba angu. 30 Inini naBaba angu tiriumbe. 31 UaJuda vakatonhe-

raze mapuwe kuti vamuponde. 32 Jesu wakavapingura, Ndakamuonisa mishando mizhinji yakana inobva kuna Baba; ngouri kwelyo mishando womunondiponda ngemapuwe? 33 UaJuda vakavapingura, Atikupondi ngendaa yomushando wakanaka, asi ngendaa yokutuka, nangokuti iwewe uri munhu, unodzilita Mjari. 34 Jesu wakavapingura, Akuzi kunyorwa here muzironzo zenyu kuti, Ndakati kuti muri vanamjari? 35 Kudai akavadaidza kuti vanaMjari, avo kwarakaguma izwi raMjari, (nezinyoro azingadari-kwi,) 36 Munoereketa ngenyi ndiye, uwo waakaemesa Baba noku-mutuma munyika, kuti, Unotuka Mjari, ngokuti ndakaronza kuti, Inini ndiri Mukororo waMjari? 37 Kudai ndisikati mishando yaBaba angu, musanditenda: 38 Asi kuti ndeciita, nokunyati musikatendi kwendi, tendai mishando yendinolta, kuti muzie muzwisise kuti Baba vari mukati mjangu, neni ndiri mukati mjaBaba. 39 Ndiwo vakatsakaze kumubata: asi iye wakapokonyoka kubva munyara dzavo.

40 Naye wakaendaze ruseri rwe-Jordani kundau iyo yaabapatidza Johani kutanga, wakagarapo. 41 Nevazhinji vakauya kwaari wakati, Johani aazi kuita mishamiso, asi zeshe zaakaronza Johani ngendaa youyu ziri gwinyiso. 42 Uazhinji vakamutenda apo.

**11** Zino munhu wakatikuti wairwara, waizwi Razaro we-Betani guta raMaria nahurwani ake Marta. 2 Waia aye Maria uwo wakadzodza Mambo ngemafuta,

akapukuta tsoka dzake ngebvudzi rake, ndiye waia nomukoma wake Razaro wairwara. 3 Ndiwo hanzadzi dzake dzakatumira kwaari dzeciti, Mambo, penya, aye wounda unorwara. 4 Asi apo Jesu azwa, wakati, Uku kurwara akuri kwokuti afe akadi, asi kuri kwokukurisa Mjari, kuti Mukororo waMjari airikidzwe ndikwo. 5 Zino Jesu wakamuda Marta, nomununguna wake, naRazaro. 6 Ndiwo apo azwa kuti wairwara, wakagara mazuva mairi paaindofapo. 7 Nangesure kweizi wakati kuvadzidzi vake, Dgatihwirire Judia. 8 Uadzidzi vakati kwaari, Mudzidzisi, vaJuda vaitotsaka kukuponda ngemapuwe, wohwirireyoze here? 9 Jesu wakavapingura, akati, Akuna here maawa arigumi namairi ngezuva? Kudai munhu ecihamba masikati aapumhunwi, ngokuti unoona kujeka kwomunyika muno: 10 Asi kudai munhu ecihamba usiku unopumhunwa, ngokuti aana kujeka mukati mjake. 11 Wakaereketa izi; ngesure kweizi wakati kwavari, Razaro shamjari yedu waata; asi inini ndinoenda kuti ndimumuse. 12 Ndiwo vadzidzi vakati kwaari, Mambo, kudai akaata, unozorarama. 13 Asi Jesu waiereketa ngokufa kwake: asi ivo vaikarakadza kuti waiereketa ngokuzorora mukuata. 14 Ndiwo Jesu wakati kwavari pamhene, Razaro wafa. 15 Neni ndinodakara ngepamusoro penyu kuti inga ndisipo, kuti imjimi mutende, asi ngatiende kwaari. 16 Ndiwo Tomasi uwo unozwi, Manyambiri, wakati kuvadzidzi vangani vake, Nesu ngatiendewo, kuti tife naye.

17 Naapo Jesu aguma wakaona



kuti zino inga aana mazuba maro-  
ngomuna arimuifsa. 18 Zino Be-  
tani raia pasinde peJerusarema,  
kunonga mamaera mairi: 19 Ne-  
vazhinji vevaJuda vainga vaguma  
kuna Marta, naMaria, kuti vavae-  
mbedzere ngendaa yomukoma  
wavo. 20 Ndizo Marta, apo azwa  
kuti Jesu urikuuya, wakaenda  
kwooshongana naye: asi Maria  
wakandogara mumhatso. 21 Ndi-  
zo Marta wakati kuna Jesu, Ma-  
mbo, dai wainga uri pano, mukoma  
wangu ingaasafa. 22 Nazino ndi-  
nozila kuti ico counozokumbira  
kuna Mgari, Mgari unozokupa.  
23 Jesu wakati kwaari, Mukoma  
wako unozomukaze. 24 Marta  
wakati kwaari, Ndinozia kuti uno-  
zomuka mukumuka kwomushi wo-  
kupera. 25 Jesu wakati kwaari,  
Inini ndiri kumuka nokupona:  
Iye unonditenda kunyazi afa, uno-  
zoponaze. 26 Nouwo unorarama,  
ecinditenda, aatongozofi mhera  
narini. Unotenda ici here? 27  
Wakati kwaari, Eya Mambo; Inini  
ndakatenda kuti iwewe Uri Kristu,  
Mukororo waMgari, uwo unouya  
munyika. 28 Aereketa izi, wakae-  
nda, akadaidza Maria munuguna  
wake ngokufishika, akati, Mudzi-  
dzisi waapano, unokudaidza. 29  
Naye azwa, wakakasira kumiruka  
akaenda kwaari; 30 Zino Jesu  
wainga asati aguma muguta, asi  
wala acipo paakashongana na-  
Marta. 31 Ndizo vaJuda avo vaia  
naye mumhatso vecimuembedzera,  
vaona kuti Maria wamiruka ngo-  
kukasira, akabuda, vamuteera, ve-  
cikarakadza kuti unoenda kuifa  
kwoocemapo. 32 Apo Maria agu-  
ma paia naJesu, amuona wakawa  
pashi patsoka dzake, akati kwaari,

Mambo, dai wainga pano, mukoma  
wangu inga asaurikafa. 33 Ndizo  
Jesu amuona ecicema, nevaJuda  
vecicema, avo vakauya naye, wa-  
kaita mahwema mumpeya mñake,  
wakatambudzika. 34 Wakati  
Mñakamuradzika pari? Wakati  
kwaari, Mambo, uya, uone. 35  
Jesu wakacema masodzi. 36 Ndi-  
zo vaJuda wakati. Ringirai, kumu-  
disisa kwake! 37 Asi vamgeni  
vavo wakati, Uyu munhu, waka-  
sinura madziso owaia ari bofu,  
ingaasina simba here rokuita kuti  
uyu munhu asafa? 38 Ndizo Jesu  
ecicemaze mukati mñake waka-  
guma kuifa: raia bako, nebuwe  
inga rakaridumhaldza. 39 Jesu  
wakati, Dusai buwe. Marta ha-  
nzadzi youwo wakafa wakati, kwaa-  
ri, Mambo, zino wotonuha, ngo-  
kuti waane mazuba maronggomuna  
afa. 40 Jesu wakati kwaari, And-  
zi kukuronzera here, kuti, dai  
wecitenda, ungazoona utende hwa-  
Mgari? 41 Ndizo vakadusa buwe.  
NaJesu wakamirudza madziso ake  
mudenga, akati, Baba, ndinoku-  
tenda ngokuti wandizwa. 42 Neni  
ndinozia kuti unondizwa ngenguc-  
dzeshe: asi ngepamsoro pembu-  
ngano yakaema pasinde ndaere-  
keta kudaro, kuti itende kuti ndiwe  
wakandituma. 43 Naapo aereketa  
izi wakadaidzira ngezwi guru, Ra-  
zaro, buda. 44 Uwo wainga akafa  
wakabuda, akasungwa tsoka ne-  
nyara ngemacira okuikwa nawo,  
nehope yake yakasungwa nayo  
ngejira doko. Jesu wakati kwa-  
vari, Musunhurenyi, mumurekere  
aende.

45 Ndizo vazhinji vevaJuda avo  
vakauya kuna Maria, veciona izo  
zaakaita, vakamutenda: 46 Asi

vamneni vavo vakaenda kuvaFarisi, vakavaronzera zaaingga alta Jesu.

47 Ndizo vapristi vakuru nevaFarisi vakaungana pamnepo kuita bangano, vakati, Tinozoitenyi? ngokuti uyu munhu unoitamisha miso yakawanda. 48 Kudai tecimurekera vanhu veshe vanozotenda kwaari, nevaRoma vanozouya vatibvukire zeshe ndau yedu nedzinza redi. 49 Asi umge wavo Kaiyasi, ari mupristi mukuru ngegorerero, wakati kwavari, Amuzii ciro naci-mge. 50 Nokuti kukarakadza kuti kunotamika kuti munhu umge afe ngepamsoro pevanhu, kwokuti dzinza reshe risapera. 51 Asi izi aazi kudziereketera, asi ngokuti wala ari mupristi mukuru ngegorerero, wakaprofeta kuti Jesu unozofira dzinzero. 52 Asi haiwa kufira dzinzero kwegu, asi kuti aungandzewo pamnepo vana vaMhari avo vakaparadzika kunyika dzeshe, kuti vaite umge. 53 Ndizo kubvira ngezuva iro vakaita bangano pamnepo rokuti vamuuraye.

54 Ndizo Jesu aazi kucahambaze pamhene pakati pevaJuda, asi kubva apo wakaenda kunyika iri pasinde norukaro, kudoropa rinozwi Efraemu, naapo wakagara nevadzidzi vake. 55 Nepasika re-vaJuda raia pasinde, vazhinji vakakwira Jerusarema, vecibva munharaunda, pasika risati raguma, kwokuti vadzicenese. 56 Ndizo vakamutshaka Jesu, vecibvunzana vakaema mutemperi, veciti, Munotinyi? kuti aazouyi here kumushongano wokudya? 57 Ndizo vapristi vakuru nevaFarisi vaingavakaita mupango kuti kunyazi ndiani unozia paari, ngaaronze, kuti vamuibate.

**12** Ndizo mazuva matanhatu pasika risati raguma, Jesu wakaguma Betani, apo paia naRazaro, uwo waakamusa kwavakafa. 2 Ndizo vakamuitira kudya apo, naMarta wakavaburira, asi Razaro wala umge weavo vaitseama naye pakudya. 3 Naapo Maria wakatora paundi remafuta okuzora enarde aikosha, wakadzodza tsoka dzaJesu, akapukuta tsoka dzake ngebvudzi rake. Nemhatso yakazara ngomgema wemafuta. 4 Asi Judasi Isikarioti, umge webadzidzi vake, uwo waizo mupira, wakati; 5 Kwarekerwa ngenyi kutengisa mafuta aya ngepondo dziri gumu neshanu, dzipuwe varombo? 6 Izi wakaziereketa kusiri kuvada varombo, asi ngokuti wala mbava, waingwariwa nyede, naye waitora zaliswemgo. 7 Ndizo Jesu wakati, Murekeri: waida kungwaririra aya metsa zuva rokuikwa kwangu. 8 Ngokuti varombo munavo nguva dzeshe, asi amuneni akadi nguva dzeshe.

9 Ndizo vazhinji vembungano yavaJuda vakazia kuti walapo, navo vakauya, sandikwo kwokuti vaone Jesu kwegu, asi kuti vaone Razaro, aye waakamusa kubva kwavakafa. 10 Asi vapristi vakuru vakapangana kuti vauraye naRazarowo; 11 Ngokuti ngepamsoro pake vazhinji vevaJuda vakaenda vakatenda kuna Jesu.

12 Necimangwani mbungano huru, iyo yakauya kumushongano wokudya, apo yazwa kuti Jesu wouya Jerusarema. 13 Yakatora matai emicindwi, yakabuda kwoshongano naye, vakadaidzira, veciti, Hosana, unomucena uwo unouya ngezina raMambo, ari-

Mambo waisraeri. 14 NaJesu aone mbongora itsha, wakagada padera payo, kudai ngezezakanyorwa, 15 Usatya, iwewe mukunda weZioni: ringira, mambo wako unouya, akagada padera petsiru rembongora. 16 Izizi vadzidzi vake avazi kuzwisisa pakutanga, asi apo Jesu airikidzwa, vakacizoceredza, kuti izi zainga zakanyorwa ndiye, nokuti vakamuitira izizi. 17 Nembungano iyo yaia naye apo akadaidza Razaro kubva muifa akamumusa kwevafa, yakalta ucapupu. 18 Dgeiyi ndaa mbungano yakaenda kwooshongana nayeze, ngokuti yainga yazwa kuti wakalta uyu mushamiso. 19 Ndizo vaFarisi vakaereketa pakati pavo, kuti, Ringirai, amungaiti ciro: penyai nyika yeshe inomuteera.

20 Kwaiapo vaGreki vakatikuti pakati peavo vakakwira kwoodira kumushongano wokudya; 21 Ndizo ava vakaguma kuna Firipu, uwo wala weBetisaida reGarire, vakakumbira kwaari, veciti, Cangamire, tinoda kuona Jesu. 22 Firipu wakauya, akaronzera Andreu; Andreu naFiripu vakamuronzera Jesu. 23 NaJesu wakapingura, eciti, Dguva yaguma kuti Mukororo womunhu airikidzwe. 24 Ziokwazo, ziokwazo, ndinoti kwomuri, Kudai tsangu yekoroni isikawi mumavu nokufa, inondogara iri yega, asi kuti ikafa, inozobereka tsangu dzakawanda. 25 Iye unoda kupona kwake, unozokurasha; asi iye unokunyanya kupona kwake munyika muno, unozokungwaririra kupona kusi-kaperi. 26 Kudai munhu ecindishandira ngaanditeere; nependiri

naye muranda wangu unozoapowo: kuti munhu ecindishandira, iye unozoremere dzwa ndiBaba. 27 Zino mneya wangu unoneseka; neni ndinozotinyi? Baba ndiponese kubva kuneiri awa. Asi ngeiyi ndaa ndakauyira awa iri. 28 Baba, irikidza zina rako. Apa-po rakauya izwi recibva mudenga, reciti, Ndakaririkidza, neni ndinozoriirikidzaze. 29 Nembungano yainga yakaema apo, yairizwa, yakati, Inotinhira: vamneni vakati, Ingiroso yaereketa naye. 30 Jesu wakapingura, akati, Iri izwi arizi kuguma ngepamsoro pang'u, asi ngepamsoro penyu. 31 Zino kwaguma kutongwa kwenyika iyi; zino muzare wenyika iyi unozorashwa kubanzi. 32 Neni kudai ndecizomirudzwa panyika, ndinozokweya veshe vanhu kwendiri. 33 Wakaereketa ici ecipangidzira njira yokufa kwaaizofa ndikwo. 34 Ndizo mbungano yakamupingura, Takazwa muzironzo kuti, Kristu unozogara kunoti narini, hino unoita maronzerenyi kuti Mukororo womunhu unotamika kuti amirudzwe? Ndiani uyu Mukororo womunhu? 35 Jesu wakati kwavari, inguva doko kujeka kucipo pakati penyu. Hambal mucinokujeka kuti cidima cisamubata: nouwo unohamba mucidima aatongozili paanoenda. 36 Mucinokujeka, tendai kujeka, kuti multe vana vokujeka. Jesu wakaereketa izi, akabva apo akadzifisha kubva kwavari. 37 Nokunyati ainga aita mishamiso mizhinji pamberi pavo, kani avazi kumutenda: 38 Kwo-kuti izwi raIsaya muprofeti rizarisike, Iro rinoti, Mambo, ndiani wakatenda izwi redu, nomuoko

waJehova wapangidzirwa kunani? 39 Dgenda yeici ingavasina simba rokutenda, ngokuti Isaya unotize, 40 Iye wakapofumadza madziso avo, wakakonjisa mnyoyo yavo, kuti vasazooka ngemadziso avo, vasazia ngomnyoyo yavo, vatenderuke, ndivamhodyose. 41 Izi Isaya wakaziereketa apo aona utende hwake, akaereketa ndiye. 42 Kani pakati pemadzimambo vazhinji vakamutenda, asi ngenda yavaFarisi avazi kumutenda ngomumromo, kuti vasadzingwa kubva mumhatso yokudira: 43 Dgokuti vaipinda kuba kuirikidzwa ngevanhu kuno kuirikizwa ndiMnari.

44 Jesu wakadaidzira, akati: Iye unonditenda, aatendi inini akadl, asi unotenda kwaari wakandituma. 45 Nouwo unondiona, unoona wakandituma. 46 Inini ndakauya ndiri kujeka munyika, kuti nokunyati ndiani unotenda kwendi asacagara mucidima. 47 Kunyazi ndiani unozwa mazwi angu, asikaatendi, andimutongi inini; ngokuti andizi kuuya kutinga nyika asi kuti ndiponese nyika. 48 Iye unondiramba asikaashiri mazwi angu, unaye unomutonga: Izwi iro rendakaereketa, ndiro rinzomutonga ngomushi wokupepa. 49 Dgokuti andizi kutera kudziereketera; asi Baba uwo wakandituma iye wakandipanga cendinozoronzwa, necendinozoereketa. 50 Neni ndinozia kuti mupango wake uri kupona kusikaperi: ndizo izo zendinoereketa, ndinoziereketa kudai ngezandakaronzerwa ndiBaba.

kuti nguva yake yaguma kuti abve munyika muno, aende kuna Baba, avada vake avo vari munyika, wakavada metsa mukupera. 2 Kucadyiwa, Satani inga atopinda munyoyo mwaJudasi Isikarioti mukororo waSimoni, kuti amupire; 3 Ecizia kuti Baba ainga amupa zeshe munyara dzake, nokuti wakabvo kuna Mnari, nokuti unoenda kuna Mnari; 4 Wakamiruka kubva pakudya, wakakumura zokupfeka zake, wakatora jira rokukupkuta ndiro, akadzisimldza ndiro; 5 Naapo wakadurura mvura mndiro, akatanga kusuka tsoka dzevadzidzi, nokudzipukuta ngejira raalinga akasimirero. 6 Ndizo wakaguma panaSimoni Petro: aye wakati kwaari, Mambo, Iwewe unosuka tsoka dzangu here? 7 Jesu wakapingura, akati kwaari, Ico cendinoita, autocizii zino, asi unozocizia ngesure kweizi. 8 Petro wakati kwaari, Aungasuki tsoka dzangu narini. Jesu wakapingura Dai ndisikakusuki, auna ugaro neni. 9 Simoni Petro wakati kwaari, Mambo, kusacaita tsoka dzangu dzega asi nadzo nyara dzangu nesoro rangu. 10 Jesu wakati kwaari, Iye wasukwa aacatami ciro cimneni kwega kusuka tsoka dzake, asi waceneswa aemho: nemni muri vaceneswa, asi haiwa mgeshe. 11 Dgokuti waimuzia uwo walzomupira, ndizo wakati, Amuzi kuceneswa mgeshe.

12 Ndizo apo ainga asuka tsoka dzavo, nokutora zokupfeka zake, nokugara pashize, wakati kwavari, Munozia here cendamuitira? 13 Munondidaidza kuti, Mudzidzisi, nokuti Mambo, nemni munonasa

**13** Zino kusati kwaguma kudya kwepasika, Jesu ecizia



kuronza; ngokuti ndiriye. 14 Ndi-  
zo kudai inini Mambo noMudzi-  
dzisi, ndasuka tsoka dzenyu, ne-  
mjiwo kunotamika kuti musukane  
tsoka dzenyu: 15 Ngokuti nda-  
mupa clonero, kuti nemji multe  
kudai ngezandaita kwomuri. 16  
Zirokwazo, zirokwazo, ndinoti  
kwomuri, Muranda aatongopindi  
mambo wake, ze nowakatumba  
aatongopindi uwo wakamutuma.  
17 Kudai mjecizila izi, munomu-  
cena kudai mjeciziita. 18 Andie-  
reketi ndimji mjeshe akadi; ndi-  
novazia avo vendakatsanangura:  
asi kuti cinyorwo cizarisike, cinoti,  
Aye unodya cingwa cangu, waka-  
ndimirudzira cisisinho cake ku-  
rwisana neni. 19 Kubvira zino  
ndinomuronzera zisati zaitika, kuti  
zaitika mutende kuti ndiriye.  
20 Zirokwazo, zirokwazo, ndinoti  
kwomuri, Iye unoashira uwo we-  
ndinotumba unoashira inini; nouwo  
unondlashira, unoashira uwo wa-  
kandituma.

21 Apo Jesu aingga aereketa izi  
wakatambudzika mumjeya mja-  
ke, wakupupura akati, Zirokwazo,  
zirokwazo, ndinoti kwomuri, kuti  
umje kwomuri unozondipira.  
22 Vadzidzi bakaringirana veci-  
tsutsumja kuti unoereketa ndiani.  
23 Walapo umje wavadzidzi vake  
waingga akatseama paditi raJesu  
waldiwa ndiJesu. 24 Ndiwo Si-  
moni Petro wakamukopera kuti  
abvunze kwaari, kuti ndiani waa-  
noereketa ndiye. 25 Ndiwo uwo  
wakatseama paditi raJesu wakati  
kwaari, Mambo, ndiani? 26 Ndi-  
zo Jesu wakapingura, Ndiye uwo  
wendinozosheya mushuva ndi-  
mupe. Naapo asheya mushuva  
wakaupa Judasi Isikarioti muko-

roro waSimoni. 27 Nangesur-  
kwomushuva, Satani wakapoter  
kwaari. Ndiwo Jesu wakati kwaari,  
Ico counolta cilita ngokukasira.  
28 Kwala kusina munhu pakudya  
wakazia singwisngwi yezaakaere-  
keta kwaari: 29 Ngokuti vamjeni  
vaipinimidza kuti, ngokuti Judasi  
wala nenyede kuti Jesu wakati  
kwaari, Tenga zetinotama mupa-  
sika; nokuti ahine ciro kuvarombo.  
30 Ndiwo iye aashira mushuva  
paripo wakaabuda kuenda: inga  
hwaausiku.

31 Ndiwo, apo abuda, Jesu wa-  
kati, Zino Mukororo womunhu  
unoirikidzwa, naMjari unoiriki-  
dzwa mukati mjaake: 32 Kudai  
Mjari ecizoirikidzwa mukati mja-  
ake, Mjari unozomuirikidzaze mu-  
kati mjaake emene, naye unozo-  
muirikidza paripo paripo. 33 Uana  
vadoko, inguva doko ndicinemji:  
munozonditsaka, nokudai ngeze-  
ndakaereketa kuvaJuda, kuti, Pe-  
ndinoenda, amuna simba rokuu-  
yapo, nazino ndinoronza kudaro  
kwomuri. 34 Cironzo citsha ndino-  
mupa kuti mudane. Kudai ndini  
ndakamuda ngokudaro imjimji-  
wo mudane. 35 Dgeici veshe vano-  
zozia kuti imjimji muri vadzidzi  
vangu, kudai muno rudo umje  
kwoumjeni.

36 Simoni Petro wakati kwaari,  
Mambo, uno enda kuri? Jesu wa-  
kapingura, Pendinoenda, aunasi-  
mba rokunditeera zino, asi uno-  
zoteera sure kwelzi. 37 Petro wa-  
kati kwaari, Mambo, andina simba  
rokukuteera zino ngenyi? Ndino-  
zofa ngepamsoro pako. 38 Jesu  
wakapingura, Unozofa ngepa-  
msoro panggu here? Zirokwazo,  
zirokwazo, ndinoti kwomuri, jo-

ngwe arizorir' usati wandiramba katatu.

**14** Mqoyo wenyu usatambu-dzika; tendai kuna Mjari, munditendeiwo. **2** Mumhatso mjaBaba angu huriyo ugaro hwa-kawanda: kudai zisakadaro, inga ndakamuronzera; ngokuti ndino-enda kwoomunasirira ugaro. **3** Kudai ndecienda kwoomunasirira ugaro, ndinozouyaze, nokumua-shira ndemene, kuti pendiri, nemni mungazoapowo. **4** Nependi-noenda munoziziya njira. **5** Tomasi wakati kwaari Mambo, atizii pounoenda; nenjira tingaizila ngenyi? **6** Jesu wakati kwaari, Inini ndiri njira, negwinyiso, nokupona: akuna unouya kuna Baba, asikauiy ndini. **7** Kudai mjaindizila inga mjakamuzila Baba anguwo. Kucibvira pano munomuzila, nemni mjakamuona. **8** Firipu wakati kwaari, Mambo, tipangidzire Baba, nesu tikwaniswe. **9** Jesu wakati kwaari, Ndakagara newe mu-kuwo wakadai kureba, asi ausati wandizila here, Firipu? iye wakandiona inini wakaona naBaba: unoronza ngenyi kuti, Tipangidzire Baba? **10** Autendi here, kuti inini ndiri mukati mjaBaba, naBaba vari mukati mjangu? Mazwi endinoereketa kwomuri, andidzireketeri: asi Baba vanogara mukati mjangu ndivo vanoita mishando yavo. **11** Tendai inini kuti ndiri mukati mjaBaba, naBaba vari mukati mjangu, kani kuti musikatendi kudaro, tendai inini ngepamsoro pemishando yemene. **12** Zirokwazo, zirokwazo, ndinoti kwomuri, Iye unonditenda, mishando yendinoita, unozoitawo,

nemishando mikuru kune iyi unozooita, ngokuti inini ndinoenda kuna Baba. **13** Nokunyati cinyini comunozokumbira ngezina rangu, ndinozociita, kuti Baba airikidzwe ngoMukororo. **14** Kudai mjanazokumbirenyi kwendiri ngezina rangu, inini ndinozociita. **15** Kudai mjecindida, munozogwarira mipango yangu. **16** Neni ndinozokumbira kuna Baba naye unozomupa umneni Muembedzeri, kuti agare nemni kusikaperi. **17** Mneya wegwinyiso, uwo aungaa-shirwi ngenyika; ngokuti aiuoni, aiuziize: asi imnimni munouzila, ngokuti unogara nemni, unozogara mukati mnenyu. **18** Andizomusi muri nherera, ndinozouya kwomuri. **19** Kucinenguva doko nenyika aicandioni, asi imnimni munondiona, ngokuti inini ndinopona nemniwo munozopona. **20** Dgeiro zuta munozozila kuti inini ndiri mukati mjaBaba angu, nemnimni muri mukati mjangu, neni ndiri mukati mnenyu. **21** Iye unemipango yangu, eciingwarira, iye ndiye unondida: nouwo unondida: unodiwa ndiBaba angu, neni ndinozomuda, ndidzionise kwaari. **22** Judasi, (asiriye Isikarioti,) wakati kwaari, Mambo, zinoita ngenyi kuti unozodzionisa kwetiri, usikadzionisi kunyika? **23** Jesu wakamupingura, akati kwaari, Kunyazi ndiani unondida unozogwarira mazwi angu, naBaba angu vanozomuda, nesu tinouzouya kwaari, tiite ugaro hwe-du pamnepo naye. **24** Iye usikandidi, aangwariri mazwi angu: nezwi romunozwa anggerangu akadi, asi ngeraBaba angu avo vakandituma.

25 Izi ndamuronzera ndicakagara nempi. 26 Asi Muembetheri, Mjeya Wakacena, uwo wanozotuma Baba ngezina rangu, iye unozomudzidzisa ziro zeshu, amucerecedzise zeshu zendakamuronzera. 27 Kunyarara ndinokusia kwomuri; kunyarara kwangu ndinomupa: Andimupi kudai ngokupa kwenyika. Mjoyo yenyu isatambudzika, isakarukaze. 28 Mjazwa kuti ndati kwomuri, ndinoenda, neni ndinozouyaze kwomuri. Kudai mngaindida mngalozakara ngokuti ndinoenda kuna Baba, ngokuti Baba vari mukuru kwendiri. 29 Zino ndamuronzera zisati zaitika, kuti apo zazoitika mutende. 30 Dgesure kweizi andicazoereketi kakurutu nempi; ngokuti muzare wenyika iyi unouya, naye aana ciro mukati mngangu. 31 Asi kuti nyika izie kuti ndinomuda Baba, nokudai ndiBaba wakandipa mupango ngokudaro ndinoita. Mirukai, ngatibve pano.

**15** Inini ndiri muvini wecakwadi, naBaba angu murimi. 2 Matai eshe ari mukati mngangu, asika bereke micero, unoadusa, nao eshe anobara micero unootongora kuti abare micero yakapinda kuwanda. 3 Imnjimni muri vakatoceneswa ngezwi rendakaereketa kwomuri. 4 Garai mukati mngangu, neni mukati mnenyu. Kudai ngedai risina simba roku bereka micero remene, risikagari mukati mnomuvini, zakadaro nempi kudai musikagari mukati mngangu. 5 Inini ndiri muvini, imnjimni muri matai: iye unogara mukati mngangu, neni ndiri mukati mshake, ndiye unobereka micero yakawa-

nda, ngokuti ngepabanzi pangu imnjimni amungakoni kuita ciro. 6 Kunyazi ndiani usikagari mukati mngangu, unorashwa kudai ngedai, rinofota, nabo vanoauganidza vaposhere mumuriro, nao anotsa. 7 Kudai mnejigara mukati mngangu, nemazwi angu anogara mukati mnenyu nempi munozokumbira ico comunoda, naco cinozoitwa kwomuri. 8 Dgeici Baba angu vanoirkidzwa, kuti mubare micero yakawanda, ngokudaro munozoita vadzidzi vangu. 9 Kudai ndiBaba vakandida, zakadaro neni ndakamudawo: garai murudo rwangu. 10 Kudai mnejingwarira mipango yangu, munozogara murudo rwangu; kudai ndini ndakangwarira mipango yaBaba angu, nokugara murudo rwake. 11 Nda-kaereketa izi kwomuri kuti kudakara kwangu kugare kwomuri, nokuti kudakara kwenyu kuzarisike. 12 Uyu ndiwo mupango wangu, kuti mudane, kudai ndini ndakamuda. 13 Akuna munhu unorudo rukuru kuno urwu, kuti munhu afe ngepamsoro peshamhari dzake. 14 Imnjimni muri shamhari dzangu kudai mnejilita izo zendinomupangira. 15 Andicamudaidzi kuti muri varanda, ngokuti muranda aazli cinoitwa ndiMambo wake: asi ndakamudaidza kuti muri shamhari; ngokuti zeshu zendakazwa kunaBaba angu, ndakazilisa kwomuri. 16 Imnjimni amuzi kunditsanangura, asi ndakamutsanangura inini, ndikamuemesa kuti muende, mubereke micero, nokuti micero yenyu igare: kuti kunyazi cinyini comunozokumbira kuna Baba ngezina rangu, vacihine kwomuri. 17 Izi

ndinomupanga kuti mudane. 18 Kudai nyika yecimunyanya, munozia kuti yakatanga kundinyanya inini. 19 Kudai mñaia vomunylaka, nyika yaizoda bayo: asi ngokuti amuri vomunylaka akadi, asi ngokuti ndakamutsanangura kubva munylaka, ndizo nyika inomunyanya. 20 Karakadzai izwi iro re-ndakaereketa kwomuri, kuti, Muranda aatongopindi Mambo wake. Kudai vakandishononesha inini, vanozomushononesawo: kudai vakangwarira izwi ranggu, vanozongwarira nerenyuwo. 21 Kani zeshe izi vanozomuitira ngendaa yezina ranggu, ngokuti avamuzii uwo wakandituma. 22 Kudai ndisikazi kuuya ndikaereketa kwavari, avasaliza nokushaisha: asi zino avacina cokutenda murandu ngokushaisha kwabo. 23 Uwo unondinyanya, unonyenyawo Baba angu. 24 Kudai ndisakaita pakati pavo mishando iyo isikazi kumboitwa ngoumneni, vangadai vasina kushaisha: asi zino vakaona vakanyanya teshe inini naBaba angu. 25 Asi kuti izwi rizarisike iro rakanyorwa muzironzo zavo, rokuti, Vakandinyanya, pasina ndaa. 26 Asi apo aguma Muembedzeri, uwo wendinozotuma kwomuri ecibva kuna Baba, Mjeya wegwiniso, unobva kuna Baba, iye unozopupura ndini; 27 Nemnize munozopupura, ngokuti mñaia neni kubvira mukutanga.

**16** Ndakaereketa izi kwomuri kuti musapumhuniswa.

2 Vanozomudzinga kubva mhatso dzavo dzokudira: eya, nguva inouya apo munhu weshe, unozomuura, unozopinimidza kuti

unomushandira Mjari. 3 Nao vanozoita izi ngokuti avazi kumuzia Baba, nokuti inini. 4 Asi ndakamuronzera izi, kuti, apo yaguma nguva yazo, mucerecedze kuti ndakamuronzera ndizo. Asi andizi kumuronzera izi kubvira pakutanga, ngokuti ndainga ndicinemni. 5 Asi zino ndinoenda kuno uwo wakandituma; akuna naumne wenyu unondibvunza, kuti, Unoenda, kuri? 6 Kani ngokuti ndakaereketa izi kwomuri, mjoyo yenyu yazara ngokusururika. 7 Asi ndinomuronzera gwinyiso; kuti za kamunakira kuti ndiende: ngokuti kudai ndisikaendi, Muembedzeri aazouyi kwomuri: asi kudai ndikaenda, ndinozomutuma kwomuri. 8 Naye apo auya unozotenhisa nyika ngendaa yokushaisha, nangokururama, nangokutonga. 9 Ngendaa yokushaisha ngokuti avanditendi; 10 Ngendaa yokururama ngokuti ndinoenda kuna Baba, nemni amucazondioni; 11 Ngendaa yokutonga ngokuti muzare wenyika ino wakatongwa. 12 Ndicine zizhinji zokumuronzera, asi amusati mñaane simba rokuzizwisisa zino. 13 Asi apo iye auya, Mjeya wegwiniso, unozomuratidza gwinyiso reshe: ngokuti aazodziereketeri, asi zaanozwa, ndizo zaanozoereketa, naye unozomupangidzira zinozouya. 14 Uwo unozondiiridza, ngokuti unozashira zokwangu, nokuzizisa kwomuri. 15 Zeshe zaanao Baba ngezangu; ndizo ndakati kuti, Unozoashira zokwangu, nokuzipangidzira kwomuri. 16 Inguva doko nemni amucazondioni, nenguva dokoze nemni munozondiona. 17 Uamneni vevadzidzi vake va-



kaereketa pacavo, veciti, Cinyini ici caanoereketa kwetiri, kuti, Inguva doko nempi amucazon-dioni, nenguva dokoze nempi munozondiona, ecitize, Dgokuti ndinoenda kuna BaBa? 18 Ndiwo vakati, Cinyini ici caanoereketa, kuti, Inguva doko? Atizii kuti unoronzenyi. 19 Jesu waizila kuti valda kumubvunza, naye wakati kwavari, Munobvunzana here pakati penyu, ngeico cendaronza, kuti, Inguva doko nempi amucazon-dioni, nenguva dokoze, nempi munozondiona? 20 Zirowazo, zirowazo, ndinoti kwomuri, kuti munozocema nokuoorera, asi nyika inozodakara: impi munozotambudzika, asi kutambudzika kwenyu kunozotsandudzwa kuita kudakara. 21 Dzimal ropotwa ngokubereka rinotambudzika, ngokuti nguva yaro yaguma: asi rabereka mpiana, aricakaradzi ngokurwadiwa, ngendaa yokudakara kuti mpianarume wabarwa munyika. 22 Nempi munozotsumba zino, asi ndinozomuonaze nemoyo yenyu inozodakara, nokudakara kwenyu akuna munhu unokudusa kubva kwomuri. 23 Dgeiro zuva amuzondibvunzi ciro. Zirowazo, zirowazo, ndinoti kwomuri, Nokunyati cinyini comunozokumbira kuna BaBa ngezina ranggu, unozochina kwomuri. 24 Metsa zino amuzi kukumbira ciro ngezina ranggu: kumbira nempi munozoa-shira kuti kudakara kwenyu kuza-risike.

25 Ndakaereketa izi kwomuri ngemiedzani, asi nguva inouya apo andicazoereketi kwomuri ngemiedzani, asi ndinozomupangidzira pamhene ndiBaBa. 26 Dgei-

ro zuva munozokumbira ngezina ranggu, neni andironzi kwomuri kuti ndinozomukumbirira kuna BaBa; 27 Dgokuti BaBa emene unomuda, ngokuti impi mpa-kandida, nempi mpakatenda kuti ndakabva kuna Mpari. 28 Ndakabva kuna BaBa, ndakaguma munyika; ze, ndinosia nyika, ndiende kuna BaBa. 29 Uadzidzi vake vakati kwaari, Ringira zino worowoe-reketa pamhene, aucaereketi ngemiedzani. 30 Zino tinozia kuti unozia zeshe, autami kuti munhu naumge akubvunze: ngeici tintenda kuti iwewe wakabva kuna Mpari. 31 Jesu wakavapingura, eciti, Zino munotenda here? 32 Ringirai, nguva inouya, eya yatoguma, kuti munozoparadzwa uwo nouwo kune zakwe, nokundisia ndega: kani andiri ndega akadi: ngokuti BaBa uneni. 33 Izi ndakamuronzera kuti kwendiri muone kunyarara. Munyika munozoa nenyatwa: asi shingai moyo, ndalinyisa nyika.

**17** Jesu wakaereketa izi, wakamirudza madziso ake mudenga, akati, BaBa, nguva yaguma: Irikidza Mukororo wako, kuti Mukororo wako akurikidze: 2 Kudai ngezewakamupa simba padera penyama yeshe, kwokuti veshe vovakamupa, iye avape kupona kusikaperi. 3 Uku ndikwo kupona kusikaperi, kuti vakuzie iwewe Mpari wega wegwiniso, naJesu Kristu uwo wowakatuma. 4 Nda kakurikidza munyika; ndakapedza mushando wowakandipa kuti ndiuite. 5 Nazino, iwewe BaBa, ndiurikidze wemene ngokurikidzwa ukwo kwendaia nakwo

newe, ngepamberi nyika isati yaa-po. 6 Ndakapanggidzira zina rako kuna avo vanhu vowakandipa kubva munyika: vaia vako, newe wakavahina kwendiri, navo vakaringwarira izwi rako. 7 Zino vanoza kuti zeshe zewakandipa zakabva kwouri: 8 Ngokuti mazwi owakandipa ndakaapawo kwavari, navo vakaashira, vakazia ngegwiniso kuti ndakabva kwouri, vakatenda kuti iwewe wakandituma. 9 Ndinovakumbirira; andikumbiriri nyika, asi avo vowakandipa, ngokuti vari vako. 10 Nazeshe zangu ngezako nezako ngezangu: neni ndinoirikidzwa ndivo. 11 Andicimpo akadi munyika, asi ava vaciri munyika, neni ndouya kwouri. Baba Uakacena, vangwarire ngezina rako, avo vowakandipa: kuti vazoita umge kudai tisu. 12 Apo ndicinavo ndakavangwarira muzina rako, avo vowakandipa: ndakavarinda, akuna namwe wavo wakatsakatika, kwega mukororo wokurashwa, kuti zinyoro zizarisike. 13 Nazino ndinouya kwomuri, neizi ndinoereketa munyika kuti kudakara kwangu kuzarisike mukati mnavo. 14 Ndakahina kwavari izwi rako, nenyika yakavanyenya, ngokuti avari venyika akadi, kudai ndini andiri wenyika akadi. 15 Andikumbiri kuti muvaduse kubva munyika, asi kuti muvangwarire kubva kuno uwo wakashata. 16 Avari venyika akadi, kudai ndini andiri wenyika. 17 Vacenese ngegwiniso: izwi rako riri gwinyiso. 18 Kudai ngezowakandituma munyika, ngokudaro neniwo ndinovatuma munyika. 19 Ngepamso pavo ndinodzicenesa, kuti navowo vaceneswe

ngegwiniso. 20 Andivakumbiriri ava vega, asi naavo vanozotenda kwendiri ngezwi ravo. 21 Kutiveshe vaite umge, kudai ndiwe Baba uri mukati mangu, neni ndiri mukati mnavo, kuti navo vagare mukati mgedu, kuti nyika itende kuti iwewe wakandituma. 22 Noutende, hwowakandipa, ndakahupawo kwavari; kuti vaite umge kudai tisu tiriumge. 23 Inini mukati mnavo, newe mukati mangu, kuti vaitwe vakaperera vari umge: kuti nyika izie kuti iwewe wakandituma, nokuti unovada kudai ngezounondida inini. 24 Baba, vowakandipa ndinoda kuti vaapo pendiri kuti varingire utende hwangu, uhwo hwowakandipa inini: ngokuti wakandida nyika isati yaemeswa. 25 Baba vakarama, nyika aizi kukuzia asi inini ndinokuzia; naava vakazia kuti iwewe wakandituma; 26 Neni ndakavaziisa zina rako, neni ndinozoriziisa, kuti rudo urwo rwo-wakandida ndirwo rugare mukati mnavo, neni mukati mnavo.

**18** Apo Jesu ainga aereketa izi, wakaſuda nevadzidzi vake vakaambuka ruseri rwomukova Kedroni, apo paia nomunda, iye wakapoterera mukati mnavo nevadzidzi vake. 2 NaJudasi uwo wakamupira, waizia ugarohwo, ngokuti Jesu waiunganompo kazhinji nevadzidzi vake. 3 Ndizo Judasi aashira cikwata, nevatungamiriri kubva kuvapristi vakuru nevaFarisi, vakagumapo, vanezi-veneko, namasasi nezokurwa ndizo. 4 Ndizo Jesu ecizia zeshe zinozomugumira, wakaſudira kwavari, akati kwavari, Munotsaka

anani? 5 Wakamupingura, Jesu weNazareta. Wakati kwavari, Ndini. NaJudasize uwo wakamupira, waing'a akaema navo. 6 Ndizo apo avaronzera kuti, Ndini, vakaita pfundamutete, vakawa pashi. 7 Ndizo wakavabvunzaze, akati, Munotsaka anani? navo vakati, Jesu weNazareta. 8 Jesu wakavapingura, Ndamuronzera kuti ndini: ndizo kuti mjecitsaka inini, rekerai aya vaende. 9 Kutizwi rizarisike, iro rinoti, Avo vovakandipa andizi kurashikirwa naumne wavo. 10 Ndizo Simoni Petro inga aneshoti, wakaishwamura, wakatema muranda womupristi mukuru, akagura nzee yake yokumudyo: zina romuranda uwo raia Marikusi. 11 Ndizo Jesu wakati kuna Petro, Hwirinza shoti yako mumakara ayo: tsani yaakandipa Bafa, andizoimni here?

12 Ndizo cikwata nenduna nevatungamiriri vevaJuda vakabata Jesu, vakamusunga, 13 Navo vakamuunza kutanga kuna Anasi: ngokuti iye waia muzere waKaiafasi, uwo waia mupristi mukuru ngeggorero. 14 Zino Kaiafasi ndiye wakanyowedza vaJuda kuti kwaidikana kuti munhu umne afire vanhu.

15 Asi Simoni Petro wakamuteera Jesu, nomudzidzi umneni. Zino uwo mudzidzi waziikanwa kumupristi mukuru, naye wakapoterana Jesu muruanze rwomupristi mukuru. 16 Asi Petro wakaema pasiwo kubanzi. Ndizo mudzidzi umneni uwo waiziikanwa kumupristi mukuru wakabuda pabanzi akaereketa kunouwo waingwarira musiwo, akapotedza Petro. 17 Ndizo musikana uwo

waingwarira musiwo, wakati kuna Petro, Newe auri umne here wevadzidzi vouyu munhu? Wakati, Andiriye akadi. 18 Navaranda nevatungamiriri vakaema apo, vakabasa muriro wamasimbe; ngokuti kwala necando; valota: naPetro wakaema navo ecloa.

19 Ndizo mupristi wakabvunza Jesu ngendaa yavadzidzi vake, nangokudzidzisa kwake. 20 Jesu wakamupingura Inini ndakaereketa pamhene kuvanhu venyika: nguva dzeshe ndaidzidzisa mumhatso dzokudira, nomutemperi apo palungana veshe vaJuda, andizi kuereketa ciro ngokufishika. 21 Unondibvunzirenyi? Bvunza avo vakandizwa, cendakaereketa kwavari: ringira, avo vanoza zindakaereketa inini. 22 Naapo aing'a aereketa izi umne wevatungamiriri vaing'a vakaema apo wakamurova Jesu ngorupi eciti, Unopingura mupristi mukuru kudaro here? 23 Jesu wakamupingura, Kudai ndaereketa zakashata, pupurira ngezakashatezo; asi kudai zanaka, unondiroverenyi? 24 Ndizo Anasi wakamutumira akasungwa kuna Kaiafasi mupristi mukuru.

25 NaSimoni Petro wakaema ecloa. Ndizo vakati kwaari, Newe auri umne here wevadzidzi vake? Iye wakavapingura, akati, Andiriye. 26 Umne wevaranda womupristi mukuru waia hama youwo waakatema nzee Petro, wakati, Andizi kukuona unaye mumunda here? 27 Ndizo Petro wakakanidzaze, paripo jongwe rakarira.

28 Ndizo vakamukweya Jesu kubva kuna Kaiafasi vecienda naye kumhatso yokutongera: inga aci-

mangwanani; avo vemene avazi kupotera mumhatso yokutongera, kuti vasazosipiswa, kwokuti vadye pasika. 29 Ndizo Piratu wakaɓudira kwavari, akati, Ndaa ngeyenyl yomunoitira uyu munhu? 30 Uakapingura, vakati kwaari, Kudai uyu munhu asalita zaka-shata, inga tisikazi kumupira kwouri. 31 Ndizo Piratu wakati kwavari, Mutorenyi imnjimni mumutongge kudai ngezironzo zenyu. UaJuda vakati kwaari, Akutendwi kuti isisu tiuraye munhu nokuti ngouri: 32 Kwokuti rizarisike izwi iro raakaereketa Jesu ecipangidzira kuti unozofa ngokufanyi.

33 Ndizo Piratu wakapoteraze mumhatso yokutongera, adaidza Jesu, akati kwaari, Iwewe uri Mambo wavaJuda here? 34 Jesu wakapingura Unodziereketa ici here nokuti vamneni vakacironzera kwouri ndini? 35 Piratu wakapingura, Inini ndiri muJuda here? Dzinza rako nevapristi vakuru vakakupira kwendiri: cinyini cowa-kamboita? 36 Jesu wakapingura, Umambo hwangu angohwomunyika muno akadi: kudai umambo hwangu hwaia hwomunyika muno inga dzakandirwira nhunge dzangu, kuti ndisahinwa kuvaJuda: asi zino umambo hwangu auhuri hwomuno akadi. 37 Ndizo Piratu wakati kwaari, Ndizo uri Mambo here? Jesu wakapingura, Iwewe unoronza kuti ndiri Mambo. Dgeiyi ndaa ndakaɓarwa, nangeiyi ndaa ndakauya munyika, kwokuti ndipupurire gwinyiso: kunyazi ndiani uri wegwinyiso unozwa izwi ranggu. 38 Piratu wakati kwaari, Gwinyiso cinyini? Aereketa ici, wakaɓudiraze kuvaJuda, akati

kwavari, Andioni ndaa kwaari. 39 Asi imnjimni muno mutoo wokuti ndisunhurire umge kwomuri ngepasika: ndizo munoda here kuti ndisunhure kwomuri Mambo wevaJuda? 40 Ndizo vakazhambarrara, veciti, Haiwa uyu, asi Baraba. Zino Baraba wala dzongoni.

**19** Ndizo apo Piratu wakamutora Jesu, akamucaya. 2 NemaJoni akaruka dzungudza reminzwa, akariisa padera pesoro rake akamupfekesa ngeenguwe yakatsukuruka; 3 Akauya kwaari akati, Cangamire, Mambo wevaJuda! Nao akamurova ngorupi. 4 NaPiratu wakaɓudaze, akati kwavari, Ringirai, ndinomubudisa kwomuri kuti muzie kuti andioni ndaa kwaari. 5 Ndizo Jesu wakaɓuda, akapfekeswa dzungudza reminzwa, nenguwe yakatsukuruka. Piratu wakati kwavari, Ringirai uyu munhu! 6 Ndizo apo vapristi vakuru, nevatumgamiriri vamuona, vakazhambarara, veciti, Mukohomere, mukohomere. Piratu wakati kwavari, Mutorenyi imnjimni mukohomere: ngokuti andioni ndaa kwaari. 7 UaJuda vakamupingura, Tinecironzo, ngecironzo ici kunosisa kuti afe, ngokuti iye wakadziita Mukororo waMjari. 8 Ndizo apo Piratu azwa izwi iri, wakapinda kutya. 9 Wakapoteraze mumhatso yokutongera, akati kuna Jesu, Unombobva pari? Asi Jesu aazi kumupingura. 10 Ndizo Piratu wakati kwaari, Aundipi-nguri here? Auzii here kuti ndine-simba rokukusunhura, neni ndine-simba rokukukohomera? 11 Jesu wakamupingura, Aunga anesimba padera pangu kuti usikazi kuripu-



wa recibva mudenga: ndizo uwo wakandipira kwouru unokushaisha kwakapinda kukura. 12 Dgesure kweizi Piratu wakatsaka kuti ungamusunhura: asi vaJuda vakadaidzira, veciti, Kuti ukasunhura uyu, auri shambari yaKesari akadi: nokunyati ndiani unodzita Mambo unoereketa kumukira Kesari. 13 Apo Piratu azwa aya mazwi wakamubudisa Jesu kubanzi, wakagara pacigaro cikutongera ndaa, pandau inozwi yakagangatwa mapuwe, asi ngokweciHeberu inozwi Gabata. 14 Kwaia nguva yokunasirira pasika kuno ngaawa recitanhatu: naye wakati kuvaJuda, Ringirai Mambo wenyu! 15 Ndizo vakadaidzira, Mudusenyi, mudusenyi, mumukohomere. Piratu wakati kwavari, Ndokohomera here Mambo wenyu? Upristi vakuru vakapingura, Isisu atina mambo ega Kesari. 16 Ndizo iye wakamupira kwavari kuti akohomerwe. Navo vakamutora Jesu: 17 Naye wakabuda ecitwara mucinjiko kunda kundau inozwi Dehenya, iyo inodaidzwa ngokweciHeberu, Gorogota, 18 Apo ndipo pevakamukohomera, pamhepo nevairi vanhani, umhe ngeino, noumneni ngelyo, naJesu ngepakati. 19 NaPiratu wakanyoraze cinyoro akacisa padera pomucinjiko; uku ndikwo kunyorwa kwaco, JESU WENAZARETA MAMBO WE-UAJUDA. 20 Ndizo ici cinyoro cakadzidzwa ngevazhinji vavaJuda; ngokuti ndau iyo yaakakohomerwa Jesu yala pasinde nedoropa: naco inga cakanyorwa ngokweciHeberu, nokweciRoma, nokweciGrek. 21 Ndizo vapristi vakuru vevaJuda wakati kuna Pira-

tu, Usanyora kuti, Mambo wevaJuda, asi kuti iye wakati, Ndiri mambo wevaJuda. 22 Piratu wakapingura, kuti, Cendanyora, ndanyora.

23 Ndizo majoni apo ainga akohomera Jesu, akatora zokufuka zake, akazipaura kuita mirwi mirongomuna kujoni rimhe ngarimhe murwi waro; nehanzu yakeze yainga isina musono, asi inga yakarukwa kubvira ngedera kwayo metsa urebu hwayo hweshe. 24 Ndizo akaereketisana pakati pavo, eciti, Tisaibaura, asi ngatiringidzire hakata tione kuti ngeyani: kuti cinyoro cizarisike, cinoti, Uakakoanisirana zokufuka zangu pakati pavo, nehanzu yangu yakaringidzirwe hakata. Ndizo majoni akaita izi. 25 Asi inga kwa-kaemapo pasinde pomucijiko waJesu mai ake, nahurwani amai naMaria, mukadzi waKropasi, naMaria Magadarene. 26 Ndizo Jesu aona mai ake nomudzidzi uwo waaida veclema pasindepo, wakati kuna mai ake, Dzimai, wona mukororo wako! 27 Ndizo wakati kuna mudzidzi uwo, Wona mai ako. Kubvira ngeawa iro uwo mudzidzi wakavatora kuti vagare kanyi kwake.

28 Sure kweizi Jesu ecizia kuti zino zeshe zainga zaperera kuti cinyoro cizarisike, wakati, Nopera ngenyota. 29, Ndizo kwakaiswa apo ndiro yakazara ngevini, rairungura, navo vakaisa dangapxizhi rakazara ngevini rairungura pahisopi, vakariisa pamuromo wake. 30 Ndizo apo Jesu ashira vini rairungura wakati, Zopera, wakakotamisa soro rake wakafa.

31 Ndizo vaJuda, ngokuti rala zuva rokunasirira pasika, kwokuti miiri isagara iri pamucinjiko ngezuvu resabata, ngokuti iro zuva resabata rala zuva guru, vakakumbira kuna Piratu kuti mirenje yave igurwe, nokuti vaduswepo. 32 Ndizo majoni akauya, akagura mirenje yowokutanga, neyo unhani, avo vakakohomerwa naye: 33 Asi apo aguma panaJesu, akaona kuti ingaafa, aazi kugura mirenje yake, 34 Asi umne wemajoni, wakaſaya rutii rwake ngomukondo, paripo kwakaſuda ngazi nemvura. 35 Nouwo wakaſiona wakaita capupu, noucapupu hwa-ke hune gwinyiso, nouyu unozia kuti unoereketa gwinyiso, kwokuti imjimi mutende. 36 Ngokuti izi zakaitika kuti cinyoro cizarisike, cinoti, Godo narimne rake arizogurwi. 37 Necinyoro cimnenize cinoti, Uanozomuringira, uwo we-wakaſaya.

38 Ngasure kweizi Josefa we-Arimatia, ari mudzidzi waJesu asi ngokufishika ngokutya vaJuda, wakakumbira kuna Piratu kuti unga dusa muiri waJesu: naPiratu wakamutendera. Ndizo wakauya akadusa muiri wake. 39 NaNikodemusi ze wakauya, uwo wakauya kwaari pakutanga usiku, eciunza mutombo wakaita mvemve wemure nowemuaro uremu hwawo hwaia mapauli ari zana. 40 Ndizo vakatora muiri waJesu, vakauputira ngejira rorukangaza pamnepo nomutombo wemaka, kudai ngomutoo wevaJuda wokuika. 41 Zino kwaipo munda pandau iyo yaakakohomerwa, nomumunda uwo mſaia neifa idza risikazi kumboikwemno munhu. 42 Ndizo

vakaika umno Jesu ngokuti rala zuva rokunasirira revaJuda; ngokuti ifa iro rala pasindepo.

**20** Zino ngezuvu rokutanga reviki ngesure kwesabata wakauya Maria Magadareni mangwanani kucakaſipa kuifa, wakaona ſuwe rakamburumbudzwa kubva paifa. 2 Ndizo wakarumba akaguma kuna Simoni Petro nokuno mudzidzi umneni uwo waaida Jesu, akati kwavari, Uakadusa Mambo kubva muifa, nesu atizii pevakamuradzika. 3 Ndizo Petro wakaſuda noumneni mudzidzi vakaenda kuifa. 4 Zino vakarumba vari pamnepo: mudzidzi umneniwo wakapindira Petro, naye wakatanga kuguma kuifa. 5 Ecikotama paſhi, wakaringira mukati, akaona macira orukangaza akaradzikwa, asi aazi kupindemno. 6 Ndizo Simoni Petro wakagumawo, ecimuteera, iye wapotera muifa, akaona macira orukangaza akaradzikwa. 7 Neduku iro ralinga rakasungwa musoro mſake risikazi kuradzikwa pamnepo namacira orukangaza, asi inga rakapetwa riri rega pandau inhani. 8 Ndizo wapoterawo mudzidzi unhani, uwo wakatanga kuguma paifa, naye wakaona, akatenda. 9 Ngokuti inga vasati vazia cinyoro cokuti kunotamika kuti amuke kubva kwevakafa. 10 Ndizo vadzidzi avo vakaenda kanyi kwavo.

11 Asi Maria wakaema kuſanzi kweifa ecicema: acacema, wakatotama, akaringira muifa. 12 Naye wakaona ngirosi mbiri dzakafuka zakacena, dzecigara imne ngokusoro, neimneni ngokutsoka,

apo powainga wakaradzikwa muri waJesu. 13 Nadzo dzakati kwaari, Dzimai, unocemenyi? Wakati kwedziri, Igokuti vakadusa Mambo wangu, neni andizii peva-kamuradzika. 14 Apo aereketa izi wakakunukukira sure, wakamuona Jesu, akaema, aazi kumuzia kuti ndiJesu. 15 Jesu wakati kwaari Dzimai, unocemenyi? Unotaka anani? Aye ecipinimidza kuti waia murimi, wakati kwaari, Mambo, kudai wakamudusa kubva pano, ndironzere powakamuradzika, neni ndimutore. 16 Jesu wakati kwaari, Maria. Naye wakakunukuka, akati kwaari, ngorurimi rweciHeberu, Raboni, ukwo kunoti, Mudzidzisi. 17 Jesu wakati kwaari, Usandigwama, ngokuti andisati ndakwira kuna Bafa; asi enda kune vanuguna wangu, wooti kwavari, Ndinokwira kuna Bafa angu, naBafa enyu, nokuna Mgari wangu, naMgari wenyu. 18 Maria Magadareni wakauya akaronzera vadzidzi, kuti, Ndaona Mambo, nokuti wakaereketa izi kwaari.

19 Kwakati ngezwa ririro, madelkoni zuva rokutanga reviki ngesure kwesabata, misiwo yakakonyiwa umho mjaia nevadzidzi ngendaa yokutya vaJuda, Jesu wakauya akaema pakati pavo, akati kwavari, Kunyarara ngakua kwomuri. 20 Aereketa ici, waka-vapangidza nyara dzake, norutii rwake. Naapo vadzidzi vakadakara apo vaona Mambo. 21 Jesu wakatize kwavari Kunyarara ngakua kwomuri: kudai ngezaakandituma Bafa, ngokudaro ndinomotumawo. 22 Aereketa ici wakavafemera, akati kwavari, Ashi-

rai imnimgi Mneya wakacena. 23 Nokunyati ndiani vomunozorekerera zishaishi zavo zinozorekererwa kwavari, nokunyati ndiani vomusikazorekereri avazorekererwi.

24 Asi Tomasi, umhe wegumi navairi, uwo unozwi Manyambiri, wainga asiri nabo apo Jesu akauya. 25 Ndizo vadzidzi vamneni vakati kwaari, Takamuona Mambo, asi iye wakati kwavari, Kuti ndisaona munyara dzake mauri ezipikiri, ndipfekemho cinwe cangu mumaure ezipikiri, ndipfeke nyara yangu parutii rwake, andizo tendi.

26 Igasure kwemazuva mase-reze, vadzidzi vaia mukati, naTomasi wala nabo: Jesu wakauya, misiwo inga yakakonywa, wakaema pakati pavo, wakati, Kunyarara ngakua kwomuri. 27 Ndizo wakati kuna Tomasi, Tambanudza cinwe cako uone nyara dzangu, utambanudze nyara yako uipfeke parutii rwangu, usaita usikatendi, asi, unotenda. 28 Tomasi wapingura, akati kwaari, Mambo wangu, Mgari wangu. 29 Jesu wakati, kwaari, ngokuti wandiona, wazotenda; vanomucena avo vate-nda vasikazi kuona.

30 Ndizo mioniso imneni mizhinji yaakaita Jesu mukuona kwevadzidzi vake, isikazi kunyorwa mutsamba iyi: 31 Asi iyi yakanyorerwa kuti imnimgi mutende kuti Jesu uri Kristu, Mukororo waMgari, nokuti ngokutenda muano kupona ngezina rake.

**21** Igasure kweizi Jesu wakadzzipangidza kuvadzidzi vake, vari paruanhle rweTiberiasi; naye wakadzzipangidza ngenjira iyi.



2 Uala vari pamhepo Simoni Petro, naTomasi, unozwi Manyambiri, naNatanaeri, uwo waibva Kana re-Garire, nevana vaZebedi, nevamgeni vairi vevadzidzi vake. 3 Simoni Petro wakati kwavari, Ndinenda kwootupira hove. Wakati kwaari, Nesu tinoendawo newe. Uakaenda, vakakwira mungarava, ngouhwo usiku avazi kubata ciro. 4 Asi apo kwoita mambakwedza, Jesu wakaema pahumbikumbi: kanihai vadzidzi avazikuzia kuti ndiJesu. 5 Ndizo Jesu wakati kwavari, Uana munaco here cokudya? Uakamupingura, Haiwa. 6 Wakati kwavari, Kandirai rutaa ngokurutii rwokumudyo rwengarava, nemnji munozoona. Ndizo vakarukandira kudaro, ingavasina simba rokurukweya ngendaa yokuwanda kwehove. 7 Ndizo mudzidzi uwo waaida Jesu wakati kuna Petro, NdiMambo. Ndizo Simoni Petro apo azwa kuti ndiMambo, wakasimira jira rake, ngokuti wala mupunu wakadzikandira muruandhle: 8 Asi vadzidzi vamgeni vakauya vari mumukumbi, ngokuti vaia vasiri kuretu nenyika, asi kunonga makubiti arimazana mairi, vecikweya rutaa runehove. 9 Ndizo apo vaguma kuhumbikumbi vakaona apo muriro wemasimbe, nehove yakaradzikwa padera pomuriro, necingwa. 10 Jesu wakati kwavari, Unzai kubva kune hove dzemngabata zino. 11 Simoni Petro wakakwiramho akakweya rutaa kuhumbikumbi, rwakazara ngehove huru dzaiemho dziri zana nemakumi mashano nenhatu: nokunyati dzaia zhinji kudaro, rutaa aruzi kubauka. 12 Jesu wakati kwavari, Uyai mudye. Apana

noumhe wevadzidzi waishinga kumubvunza, kuti Uriani? vecizia kuti ndiMambo. 13 Jesu wakauya, akatora cingwa, akavapa, nehove ngokudaro. 14 Zino iyi yaingya yaanguva yecitatu yaakadzipangidza Jesu kupadzidzi, ngesure kwokumuka kwake kwevakafa.

15 Ndizo apo vaingya vadya, Jesu wakati kuna Simoni Petro, Simoni mukororo waJoani, unorudo here kwendiri kupinda ava? Wakati kwaari, Eya, Mambo, unozia kuti ndinokuda. Wakati kwaari, Fudza vana vemakwai angu. 16 Wakati kwaari nge ngokwecipiri, Simoni, mukororo waJoani, unorudo here kwendiri? Wakati kwaari, Eya, Mambo, unozia kuti ndinokuda, wakati kwaari, Usha makwai angu. 17 Wakati kwaari ngokwecitatu, Simoni, mukororo waJoani, unondida here? Petro wakakurudzwa mnyoyo ngokuti wakati kwaari ngokwecitatu, Unondida here? naye wakati kwaari, Mambo, iwewe unozia zeshe, unozia kuti ndinokuda. Jesu wakati kwaari, Fudza makwai angu. 18 Zirokwazo, zirokwazo, ndinoti kwouri, Apo uciri mutsa, waidzisimidza, wechamba kuende powaida: asi apo wazoa musharuka, unozotambanudzwa nyara dzako, noumgeni unozokusimidza, nokukuendisa, poukadi. 19 Wakaereketa ici ecipangidzira kuti injira yakaitawani yaizofa uwo ndiyo kuirikidza Mhari. Apo aereketa ici, wakati kwaari, Nдитеere. 20 Ndizo Petro ecikunukukira sure, wakaona mudzidzi uwo waakada Jesu, ecimuteera, aye waingya akatseama paditi rake mukudya kwemadeikoni, u-



woze wakati, Mambo, ndiani uno-zokupira? 21 Petro ecimuona, wakati kuna Jesu, Uyuke, unozoitenyi? 22 Jesu wakati kwaari, kudai ndecida kuti agare metsa ndiuye, unenyi naco iwewe? Ndi-teere. 23 Ndizo iri izwi rakabudira mukati mnebakoma, rokuti uyu mudzidzi aazofi: asi Jesu aazikuronza kwaari, kuti aazofi, asi kuti, Kudai ndecida kuti agare

ndimetse ndiuye, unenyi naco iwewe?

24 Uyu ndiye mudzidzi uwo unpupura ngeizi ziro, nowakanyora izi: nesu tinozia kuti ucapupu hwake ngohwe gwinyiso.

25 Ziripo zimneni zizhinji zaa-kaita Jesu, kudai zakanyorwa cimne ngacimne cazo, ndinoti pamneni nenyika yemene aingae-neri tsamba dzinganyorwa.